

通志堂經解

1411
6



門仁12
1411
6



紫巖居士易傳第一

乾之履

張浚

上經



乾元亨利貞

乾道也元亨利貞德也道一也德有四焉自然之
理自然之序自然之數不可易也故夫數者一二
三四是也數至四而備矣合之為十別之為五莫
非自然故夫天有四時地有四方人有四端五實
周流乎中五者皇極之中道也乾道也乾以中運
元亨利貞終始不息生化之功於是乎出元以始

之亨以通之利以裁之貞以固之天人之理無餘蘊矣

初九潛龍勿用

陽潛於一靜養之功不可不謹說之築巖尹之耕野望之釣渭顏子之陋巷大舜之深山皆勿用也而虞舜之德正配乾周文實法舜

九二見龍在田利見大人

三畫一為天二為地三為人有天斯有地有地斯有人以數言也六畫一二為地三四為人五六為天天處乎上地處乎下人處乎中以位言也見龍在田其德著見言行之脩已聞於時不有應也德

罔克施利見大人志可行矣舜三徙成都利見於堯其此時乎

九三君子終日乾乾夕惕若厲无咎

天地設位能以人成乾至於三三才備具君子觀象進德脩業以配天地乾乾動罔非天也既惕且厲畏天之誠見於此矣德業其有不大哉雖然君子何惕君子出而同人蓋將與天下共其憂是以惕乾三四不言龍龍之在人其變莫測不可以形求舜由仁義行聞善言善行若決江河莫之能禦乾乾也

九四或躍在淵无咎

四陽既壯其氣上達德成於內天其察之故或躍
下應初九正靜之心不忘脩己故在淵書記舜元德
升聞莊子謂受命於天惟舜獨也正或躍在淵也
九五飛龍在天利見大人

虞舜於是不得已而紹堯之統矣舜豈以得天下
為心哉有若飛龍勢莫可禦夫德同於天然後能
需天之澤聖人脩德於身積非一日時至德行孰
不觀化而被惠邪禹稷契皋陶之徒相與出而輔
舜見大人之利莫尚於此

上九亢龍有悔

過中故亢九而六之天地之數將窮於是聖賢處

此猶難也而況其下者乎蓋居富貴極至之地耳
目之所感移意氣之所動蕩有不可勝言者矣故
有悔云

用九見羣龍无首吉

聰明聖智守以愚貴為天子守以謙富有天下守
以儉皆用九之道九復為一羣龍畢應行中履正
不自尊貴為吉孰大帝庸作歌其在是歟

彖曰大哉乾元萬物資始乃統天雲行雨施品物流
形大明終始六位時成時乘六龍以御天乾道變化
各正性命保合大和乃利貞首出庶物萬國咸寧
萬物皆出乎一一氣之運形以之統雲行雨施功

用出矣自乾而坎自坎而艮生生生化終始無窮
 理既大明位斯時定乾何為哉乘此六陽之氣均
 調造化遲速進退制之在我元亨之功於是為大
 乾道變化聖人贊乾之功也乾之變化聖人成之
 聖人正心誠意以默贊乾元變化代興凡物有生
 各得其正天地大和參之為一利貞行矣首出庶
 物萬國咸寧不亦宜乎乾元之德至是而備四德
 分之為四合之為一於一之中四以之行

象曰天行健君子以自強不息

天以誠運其行至健生物大功自是流出君子法
 天去偽存誠求以自強自強而後能不息記曰不

息則久久則悠遠悠遠則博厚博厚則高明且夫
 君子之所不息者何道曰善道也君子勉於為善
 生物之德可以配天功用大矣

潛龍勿用陽在下也

見龍在田德施普也

終日乾乾反復道也

陽之生數中於三三三而九其變無窮故乾之九
 三有通變不息之道反復道謂心念之所起無須
 與而離於道上下互體俱乾為乾乾為反復道乾
 道也三位在辰為終日

或躍在淵進无咎也

進不失正何咎之有惟靜故正乾體具天一成數
四應初為在淵居下卦上為躍

飛龍在天大人造也

九五得陽數正中數與德符斯可以大有為於天
下蓋龍至於五而德全德全故能變能化其道若
神而功利所及者大

亢龍有悔盈不可久也

盈則失天人心夫盈天道所虧地道所變鬼神
所害人道所惡是安能久哉有大物者必用謙謙
斯亨亨斯有終矣
用九天德不可為首也

高其目而下其耳者匪天也夫有為首之心天下
孰告以善道何以主利萬物而配天之德也

文言曰元者善之長也亨者嘉之會也利者義之和
也貞者事之幹也君子體仁足以長人嘉會足以合
禮利物足以和義貞固足以幹事君子行此四德者
故曰乾元亨利貞

仁者人之本心也體之在我天下歸仁故曰體仁
足以長人萬善積於中則動皆中禮故曰嘉會足
以合禮我之為義本以利物徇往而不適其宜也
故曰利物足以和義天下之動貞夫一貞固而事
業其有不立乎故曰貞固足以幹事不言智而言

貞惡夫智容有不貞者貞固而其為智也大矣

初九曰潛龍勿用何謂也子曰龍德而隱者也不易乎世不成乎名遯世无悶不見是而无悶樂則行之憂則違之確乎其不可拔潛龍也

紆朱懷金不足以移顏氏之樂與以天下不足以改夷齊之操曰不易乎世知我者天夫何悶所樂在道夫何憂

九二曰見龍在田利見大人何謂也子曰龍德而正中者也庸言之信庸行之謹閑邪存其誠善世而不伐德博而化易曰見龍在田利見大人君德也中之用大矣言靡不信行靡不謹自然之符莫可

掩也君子方且閑邪於耳目所聞見以內守其誠謂夫有而為之不可易耳閑邪而誠自存曰閑邪存其誠善世不伐謙德行也德博而化人心格也一則潛二則見為言行上下俱陽為閑邪一在中為存誠初二皆地位二位近人為田為善世為博二陰數為不伐

九三曰君子終日乾乾夕惕若厲无咎何謂也子曰君子進德脩業忠信所以進德也脩辭立其誠所以居業也知至至之可與幾也知終終之可與存義也是故居上位而不驕在下位而不憂故乾乾因其時而惕雖危无咎矣

三四位在人人道以德業為大忠信則不欺於天
 人故德進修辭立誠則有以感動天下心故業修
 知至至之以內充乾德故可與幾知終終之以外
 盡臣節故可與存義文王在岐則然詩曰惟此文
 王小心翼翼文王雖危无咎矣

九四曰或躍在淵无咎何謂也子曰上下无常非為
 邪也進退无恒非離羣也君子進德脩業欲及時也
 故无咎

自三而四卦體於是分發上下進退義夫君子進
 而有為豈曰富貴是圖而為一己私計哉蓋將以
 大其德業而生利萬物於天下其心合天其身何

咎且四陽用事萬物發生君子體之時安可失也
 九五曰飛龍在天利見大人何謂也子曰同聲相應
 同氣相求水流溼火就燥雲從龍風從虎聖人作而
 萬物覩本乎天者親上本乎地者親下則各從其類也
 水火之於溼燥以氣求也風雲之於龍虎以聲應
 也水火以相制為用有君臣交修之道風雲以相
 感為用有君臣遇合之道聖人有作如日在天萬
 物畢照凡以得聖臣為之輔若水火風雲之流從
 耳故上治則日月星辰得其序下治則鳥獸草木
 順其性天地之間豈容有失其道理者哉乾五備
 皇極數水火金木之象具其中

上九曰亢龍有悔何謂也子曰貴而无位高而无民賢人在下位而无輔是以動而有悔也

无正位曰无位變坤陰曰无民民遠之賢去之動悔固宜矣嗚呼為君者其戒於亢哉

潛龍勿用下也

見龍在田時舍也

因時而動動得所居生利之功於是乎出

終日乾乾行事也

至誠不息以應於天曰行事

或躍在淵自試也

視吾德之所格者何如曰自試聖賢以生利萬物

為心不以一己為心其自試也非私己也

飛龍在天上治也

亢龍有悔窮之災也

九六之數俱窮故災

乾元用九天下治也

潛龍勿用陽氣潛藏

見龍在田天下文明

德化之所格致

終日乾乾與時偕行

或躍在淵乾道乃革

乾至三而內卦之體具自四以往離乎人而進乎

天矣乾道至是而變

飛龍在天乃位乎天德

德同於天曰天德聖人撫有天下以德不以勢

亢龍有悔與時偕極

乾元用九乃見天則

惟天為大惟堯則之以天為則烏乎亢故夫天運

以中聖人有為亦曰中而已

乾元者始而亨者也利貞者性情也乾始能以美利

利天下不言所利大矣哉

四德總於元成於貞貞其至矣乎利天下萬物之

道自是而出若性情之相為用也是為美利而乾

元所以為大君子貴貞用能利物

大哉乾乎剛健中正純粹精也六爻發揮旁通情也

時乘六龍以御天也雲行雨施天下平也

剛健中正德也純粹精德之幾於道也乾六陽錯

雜於六十四卦之間而天地萬物之情靡不該貫

其中曰旁通情乘六龍以調節天地之正曰以御

天雲行雨施天德行矣天下之所以平也天德以

澤物為大

君子以成德為行日可見之行也潛之為言也隱而

未見行而未成是以君子弗用也

德不成無以孚天之心君子欽畏天道是以貴

於潛也

君子學以聚之問以辯之寬以居之仁以行之易曰見龍在田利見大人君德也

君子之成其德如是學問以求益寬仁以躬行君德備矣

九三重剛而不中止不在天下不在田故乾乾因其時而惕雖危无咎矣

周公思兼三王以施四事
田中不在人故

或之或之者疑之也故无咎
天地以位言中不在人謂德進於天也文王有君

民之大德有事君之小心卒免美里之難其用是道歟

夫大人者與天地合其德與日月合其明與四時合其序與鬼神合其吉凶

天地之德莫大乎生大人生萬物之德配天地曰與天地合其德與日月合其明無不照也與四時合其序無不均也與鬼神合其吉凶無不當也大人建用中德自然之合莫可致詰矣

先天而天弗違後天而奉天時天且弗違而況於人乎況於鬼神乎

道有以財成之於先政有以欽承之於後聖人與

天為一天其違之人受命於天者也鬼神依人而
行者也其性其心其情其理惟一耳天且弗違人
鬼其有不格享者哉
亢之為言也知進而不知退知存而不知亡知得而
不知喪其惟聖人乎知進退存亡而不失其正者其
惟聖人乎

進有退之道存有亡之理得有喪之幾惟亢則天
下之善言不聞而莫有輔之者方且偃然自謂如
日之在天禍亂之生可勝諱邪聖人誠立於身學
充乎內羣賢應之中德以大用能有思有為罔不
歸正治道之永配天無極也聖人所以至此凡以

知進退存亡迭相消長而能常守其貞耳噫有大
物者可不勉夫貞哉



坤元亨利牝馬之貞

坤道貴順坤所謂順順於道非順於事牝馬取順
義而牝馬之貞有載重致遠之功必曰貞云者聖
人惡夫順而背於道不足與有為於時者也坤數
二為牝馬

君子有攸往先迷後得主

聽唱而應臣之事也然唱之不以道亦可應乎坤
之先迷厥言安在哉其戒夫君心未格而強之以

難行者邪君子必先正君君正道合上以正而唱下以正而應得主之道莫加於此矣學者不可不辯利西南得朋東北喪朋

自午而進陰日以長曰得朋自子而進陰日以消曰喪朋蓋君造始臣代終人臣立事建業以有為於下失朋儕之助有不能獨勝其任者矣故西南以得朋為利若夫立於本朝左右天子苟非絕類忘私以充盡夫大公至正之道知有國家而不知有身知有君而不知有臣其何以上得君心相與合德以治天下哉然則得朋臣之職也喪朋臣之心也以是心行是職庶幾足以體坤之道非曰命

日得之明日喪之也故夫喪朋云者喪其私云耳歸功以報於上持美以效於君但見君德而莫或有專事擅權之咎曰東北喪朋為臣如此不亦善歟安貞吉

順道喪朋以安其貞生物之功斯為大吉孰甚焉彖曰至哉坤无萬物資生大無不包至則隨之萬物賦形曰資生乃順承天

乾以一唱坤以二應其道順其承以貞坤厚載物德合无疆德厚故莫測其分量

三百六十六
含弘光大品物咸亨

蘊蓄於中者既弘發見於外者必大是以君子貴積德也德積而泰治可致

牝馬地類行地无疆

其性順其才健牝馬之貞如是徒順而已何貴夫馬哉

柔順利貞君子攸行

柔順不貞則將阿諛諂佞為天下萬物之害君子戒之

先迷失道後順得常

失弼亮之道得正靜之常

西南得朋乃與類行東北喪朋乃終有慶

陰與陰為類曰類行生化之功始終不息曰有慶

安貞之吉應地无疆

臣道至是而配乎地

象曰地勢坤君子以厚德載物

地自上而下其勢至順不復有間君子體之順於天順於道順於理順於人無所不順而德積厥躬足以安養萬物矣不亦大乎

初六履霜堅冰至象曰履霜堅冰陰始凝也馴致其道至堅冰也

方陰初生而有履霜之戒聖人其知幾矣乎蓋一

念之起發之涓涓流之江河況夫不善之跡已發見於外者哉馴致大惡無難也聖人謹禮內以正身外以正人辯之不蚤蓋非所患嗚呼君臣之間誠難也用察則近於疑疑心一生何以共事惟夫以禮正身而又以正人不待察察而姦邪無所隱其情矣

六二直方大不習无不利象曰六二之動直以方也不習无不利地道光也

坤有靜厚之德而六二得中於內所養博大故動而見於事業其直可以上通於天其方可以下法於地直自敬來雖闇室不欺也方自義來雖死生

不變也惟直故方惟直方故大吁為臣若坤六三又安有欺天失節之事哉事業之大復何疑也且君子以敬義而行乎內外其設施注措罔不悉契天人之心矣尚何待於習而後利邪竒之而一耦之而四為直方二火數為地道光

六三含章可貞或從王事无成有終象曰含章可貞以時發也或從王事知光大也

先事則迷三用含章含章蓋推美以效之君而不自暴耀於外者得臣道之貞矣書曰爾有嘉謀嘉猷則入告爾后于內爾乃順之于外曰斯謀斯猷惟我后之德嗚呼臣人咸若時惟良顯哉夫古人

豈固為是區區者乎以謂道之不通於君而君心
未孚雖欲行之天下孰與格化故美德善政必歸
之君而弗敢成蓋將使吾君身自行之吾知或從
王事以續終於後而已或不一之辭所從者非一
也君子行此是以惠澤加於天下今聞傳於後世
君子之智不亦光且大乎坤三四得互坤中位一
以光大一以无咎三含章蓋中德之積耳
六四括囊无咎无譽象曰括囊无咎慎不害也
四近君在諸卦為大臣位坤臣道也六五得臣之
正體四未得位惟含養厥德靜以待時進而至五
臣道亨矣括囊蓋內充其德待時而有為者也漢

のり

紫巖易傳卷一

十四

仲明

儒乃以囊括為譏豈不陋哉陽舒陰閉故孔子發
天地閉之訓夫閉於前而舒於後生化之功自是
出也括囊之慎庸有害邪

六五黃裳元吉象曰黃裳元吉文在中也

美德積於中而事業著於下君子之仁孰大於是
業以德成曰黃裳黃中央之色也

上六龍戰于野其血玄黃象曰龍戰于野其道窮也
六五之數疑於乾疑故戰禍亂自此起矣其道豈
不窮哉坤土為野

用六利永貞象曰用六永貞以大終也

乾坤二卦義
以大作代

君以動造始臣以靜大終天地陰陽之理不可易

三百七
也用六守貞不先事不擅權不越理不過度臣道
之美復何以加於此哉

文言曰坤至柔而動也剛

坤變則成乾矣故夫論坤者往往淪入於小人之
柔順而失坤之貞後世貪位冒寵者或借是說以
卒行其私志馴致亂國喪家而莫知悔也君子謹
養其剛而用之以柔柔以承上剛以立事

至靜而德方

後得主而有常

含萬物而化光

坤道其順乎承天而時行

天以誠運地以誠應天地合德萬物以生因時而
行動不違道然則坤所謂順順於道非順於事也
積善之家必有多餘慶積不善之家必有多餘殃臣弑其
君子弑其父非一朝一夕之故其所由來者漸矣由
辯之不早辯也易曰履霜堅冰至蓋審順也

陰主於內其事順其勢浸長嗚呼小人在下位而
不正之術足以熒惑人主之心意必自阿意順旨
中來以國以家由之而亂吁可畏也惟克己之君
為能辯之

直其正也方其義也君子敬以直內義以方外敬義
立而德不孤直方大不習无不利則不疑其所行也

敬義既立賢以類應天下悅服

陰雖有美含之以從王事弗敢成也地道也妻道也臣道也地道无成而代有終也

无成謂不敢專其事且專其功

天地變化草木蕃天地閉賢人隱易曰括囊无咎无譽蓋言謹也

謹養其德也

君子黃中通理正位居體美在其中而暢於四支發於事業美之至也

中德内充天人之理宜無不貫揚雄曰通天地人曰儒正位居體禮之著於外者也美在其中而暢

於四支發於事業蓋德禮之符云

陰疑於陽必戰為其嫌於无陽也故稱龍焉猶未離其類也故稱血焉夫玄黃者天地之雜也天玄而地黃



屯元亨利貞勿用有攸往利建侯

彖曰屯剛柔始交而難生動乎險中大亨貞雷雨之動滿盈天造草昧宜建侯而不寧

有君德而後可濟屯屯為卦震坎繼乾坤用事體具四德彖釋之曰大亨貞謂其亨之大在貞非若

乾於四德全也陽動於震變坎之險剛健不撓而生物之功於是出是為屯之貞惟貞斯有生物大

德康屯者必有生物心用以剛健不為險陷厥亨
 以大故曰屯剛柔始交而難生動乎險中大亨貞
 乾陽一再索坤得震坎曰剛柔始交陽氣未達陰
 阻其施曰難生勿用有攸往戒涉險也居屯務進
 德務安人貞其德建侯所以安人不此之務而欲
 以兵力勝是動天下兵也此其可邪互坤為建侯
 建侯蓋分地而與之共理期以濟屯夫屯難初若
 草不齊若日之昧天實為之急之則亂譬夫雷雨
 之動厥澤未霈易涸也於是而不澤人以勞來安
 集之得無亂乎故曰宜建侯而不寧震下為不寧
 蓋惟至誠不息之君然後足以濟屯至誠故不敢

安寧其道不息嗚呼康屯之利在貞在建侯而不
 寧又為康屯之本蓋人君惟無逸而增修中德然
 後賢才樂附協心一德以濟大難不然怠忽驕慢
 任非其人淪溺陷險而不可復出矣嗚呼人君必
 至誠生物之心動於內然後屯難可散也屯自坎
 變蒙自離變天地功用付之水火屯以澤施蒙以
 明著其用大矣震萑葦為草互坤上有坎位為昧
 坎變有乾體為天造震下承互坤為建侯自伏犧
 至周悉用建侯制至後世民兵分為二牧守將帥
 皆侯也然則後之欲濟屯者牧守將帥之任安可
 不重其選乎

象曰雲雷屯君子以經綸

先定規模次興事業經綸也經綸之功起於建侯而所以經綸在不寧方屯天下望治若望雲霓而須雨之來也儻非至誠不息事事得理何以使惠澤必加於下哉乾坤而繼以屯所付者大君宜盡其子誠也陽一再索經綸之義坎為弓輪初九磐桓利居貞利建侯象曰雖磐桓志行正也以貴下賤大得民也

得民心非朝夕事初之所以磐桓也志在生利天下是謂居貞位在三陰下而陰阻之為盤桓陽動於一為貞震不喪匕鬯為侯變坎而震陽在陰下

陽貴陰賤為以貴下賤其事則康屯之主下賢建侯而得天下心坤臣道賢也眾也邑也國也夫康屯而以身下賢民知惠澤必加於己胡為而不得其心哉坤眾為得民且爻辭獨言利居貞建侯而孔子復起以貴下賤之文蓋是象固有姦雄用之逆天倫亂天下者矣非正也聖人曰必正而後可故爻止曰利居貞而孔子於志行正後發此義意或曰必若湯武而後可為康屯主也

六二屯如遭如乘馬班如匪寇婚媾女子貞不字十年乃字象曰六二之難乘剛也十年乃字反常也震動坎下六二以柔乘震剛將比初而與之合邪

則為失正而陽必求陰處之甚難進退惟艱曰屯如遭如乘馬班如三陰並進有互坤體為馬阻險未進為班如二五剛柔相際五為二正應非乘初之剛則遇五而有合矣曰匪寇婚媾女子貞不字十年乃字蓋以二抱節守志於艱難之世而不失其貞也若太公在海濱伊尹在莘野孔明在南陽義不苟合是謂女貞十坤數自震初歷互坤至坎五而德位俱正君臣之分將復其常曰十年乃字君子於是可以有為而生生之功及天下矣夫君子居屯生養天下心未嘗一日忘之獨惡夫遇合不貞動不以禮喪已違天終不能建立事功以生利


萬物而獲罪於天下後世恥之不為耳互坤為女子六三即鹿无虞惟入于林中君子幾不如舍往吝象曰即鹿无虞以從禽也君子舍之往吝窮也方天下屯孰無趨赴事功之志六三以陰處震上志動而欲有為於屯險者也曰即鹿鹿性決躁三以互巽居震為鹿且三居互坤中上下皆陰所應在上上亦陰位動而用柔之剛德助何以有行於屯曰即鹿无虞惟入于林中若是則非徒莫之有獲窮不知反將罹失身之憂矣曰君子幾不如舍往吝二五上下有互艮體艮山為林中山澤之官取名以虞謂山非虞不行也艮止止故見幾曰君

子幾夫當屯難之時知己才力不足任事且无剛德之賢先後之履正而用靜焉雖无補於屯而不至冒昧僥進以敗屯事是亦君子所為也六三雖失中位而以陰履剛又在互艮中得君子之幾六四乘馬班如求婚媾往吉无不利象曰求而往明也屯必剛德可濟四以已柔求初剛曰求婚媾乘馬班如欲以禮而交接於初也三爻取義各不同夫柔遇剛而獲聖德之益往以事五其能翰忠止難於屯矣曰往吉无不利且三无虞入林中四以求往獲吉是三淪入於暗而四趨於明也明云者非徒識智之明事業亦將暴白於天下蓋四位比五

得初陽之應而往以承五且无不利四以陰求陽湯為明程氏曰居得致之地已不能而遂已至暗者也九五屯其膏小貞吉大貞凶象曰屯其膏施未光也陽動而上中未出險曰屯其膏夫德澤未厭人心欲一大不變之甚難武克商歸馬放牛示天下弗服其後周公於商民勤勤訓勉曾不憚煩不敢輒以刑罰加之懼屯膏也古之欲濟大難於天下先務畜德於身德畜而大其動必應深仁厚澤既有以服化其心將何施不得志又奚大貞凶云屯九五雖以剛中履位下無剛德臣為應卦體雲雷之氣方屯君臣之德未大孚於天下故小貞吉大貞

凶然則五求剛德以大其中施斯光矣互艮艮為光明陰掩之為未光

上六乘馬班如泣血漣如象曰泣血漣如何可長也
二三四皆坤體三爻方安靜處下乘馬班如也上居坎險極處而下又無應將何以久於上居屯者其戒之哉坎血卦為泣血



艮上

蒙亨匪我求童蒙童蒙求我初筮告再三瀆瀆則不告利貞

彖曰蒙山下有險險而止蒙蒙亨以亨行時中也匪我求童蒙童蒙求我志應也初筮告以剛中也再三

瀆瀆則不告瀆蒙也蒙以養正聖功也

離四變為蒙蒙之為卦坎處艮下遇險而止非由物蔽之而蒙也蒙有亨之道若泉出山下淵乎其居時而導之不愆厥中功利行矣匪我求童蒙童蒙求我謂九二二剛中與五本皆離體其志應中以志同五必我求初筮告誠而後告也精神之感道義之孚不啻若挾著而應之再三瀆瀆則不告啓迪之道然耳夫占筮至再三則吉凶未定適足為筮者瀆君臣師弟子間求不以誠而莫之躬行屑屑告之於道瀆矣孟子曰故將大有為之君必有所不召之臣欲有謀焉則就之其尊德樂道不

如是不足與有為初筮有尊德樂道心告宜也蒙之利在貞而養正蓋六五事業五以柔履中得坤之靜復性反德與天為一無私無欲謹養其正且九二以剛中輔導之養正之功於是大曰聖功言功利著見於天下後世而莫之已也且夫天下之亂常生於中才之主自用聰明而不能復性至靜止其私欲浸以放恣流毒天下其發甚邇其施甚遠蓋下無剛中臣告以養正之道使淪溺而與蔽蒙者均也吁可畏哉惟九二所蓄至厚以時行中上應於五志同道合聖功以著君臣之間可謂盛矣艮少男為童蒙坎信初為筮三陰為再三坎水

止山下為養正艮艮其道光明為聖功

象曰山下出泉蒙君子以果行育德

德本諸性克己復禮其德斯成譬泉之在山下循而通之滔滔茲始果行果於行也

初六發蒙利用刑人用說桎梏以往吝象曰利用刑人以正法也

蒙自離變坎變其明而離明之體常存於中初六發蒙發其明也利用刑人用說桎梏蓋將肅以憲令使天下曉然知所趨向遠罪去惡日趨善域殆有教化存於其中非謂直加刑罰故孔子釋之曰以正法過是而至用刑是懲蒙非發蒙故曰用說

桎梏以往吝且天下之蒙久矣聖人不忍天下蹈
 陷罪惡首著發蒙大訓俾治之於蚤惟人之於身
 亦然治心修性蓋不可不蚤圖必也以聖賢為典
 刑息心之偽去性之欲靜極明生得蒙之貞不然
 失禮入邪自罹戚患將無所用於世矣坎北方為
 刑法坎險為桎梏

九二包蒙吉納婦吉子克家象曰子克家剛柔接也
 包蒙若泰九二包荒以吾中養彼不中以吾才養
 彼不才曰包蒙納婦取女子得其所歸為義陰蒙
 也婦也包蒙納婦則羣陰畢應人各任職天下之
 善殆將歸我大臣事業盡是矣是可以正天下而

止其蒙曰子克家且九二剛中德足以包上下羣
 陰既有以養之又納其可任職者俾佐吾事於蒙
 誠有功矣雖然此非二功五之功也六五體童蒙
 之德方至誠虛已以下應於二二得以展盡其才
 曰剛柔接剛柔二五位也二剛中有震體震長男
 為克家

六三勿用取女見金夫不有躬无攸利象曰勿用取
 女行不順也

三過中位坎險上互坤為女互震震動三其女之
 行險而從私欲者歟見金夫謂二二有乾剛體為
 金三應在上而見金夫女失正也女失正則將失

其身何以正家故无攸利女臣象也嗚呼在臣而進不以正惟勢利之視悖天逆人以徇其私必不能忠於君而愛於人尚何所用臣哉三以不中正資而負坎險之行已麗於惡昏蔽已甚莫可救藥故蒙六爻惟三獨不言蒙吁若三蓋人臣邪僻之尤者矣坎險為行不順處艮下為不有躬艮為身為躬

六四困蒙吝象曰困蒙之吝獨遠實也

陽實陰虛四居互坤中離明之體盡消視九二上九為遠曰獨遠實實而遠之將無啓迪其蒙者矣於蒙困於道吝且人之自立天地間而可以无咎

尤於身者不過誠實而已惟君子以實德行已親君子而復性之誠蒙可脫也若小人邪偽虛誕不幸而與之處日積月改浸隨以化困其免乎四近君迺有遠實之困智慮日昏舉措日謬是將何以有行嗟夫居大位者宜以暱比小人為戒哉

六五童蒙吉象曰童蒙之吉順以巽也

五位艮中互坤承之坤順艮止有順止於道象夫蒙貞性未達若泉在山五以順巽居中誠一之德與天同心究其所養厥功為大蓋非特黜去聰明退托謙沖以用蒙於一時者所為耳故曰童蒙吉堯則天舜恭己文王純亦不已童蒙也惟六五順

止於道以下剛中之賢性修反德德至同初聖功
 遂成惠利甚大蓋君人而以誠一之德在上賢誰
 不為之盡力智誰不為之盡謀所收之功將使夷
 狄禽獸草木各得其生矧人也哉艮少男為童卦
 自離變六五有離明體是以獲童蒙之吉也

上九擊蒙不利為寇利禦寇象曰利用禦寇上下順也
 上九以剛止之德在蒙上羣陰順聽得天下心有
 思止昏昧功夫天下皆蒙待聖人迪之聖人以正
 治蒙不能使天下盡去其蒙蓋必有害吾治害吾
 道於終者是謂寇上九以剛德下臨羣陰德位俱
 勝自上而下禦寇為順以我之順正彼之逆寇將

何利曰擊云者擊而散之滌其昏蔽易其強梗德
 化之行若虞帝舞干羽而有苗格云艮手為擊三
 陰居坎險上為寇



乾下
坎上

需有孚光亨貞吉利涉大川

彖曰需須也險在前也剛健而不陷其義不困窮矣
 需有孚光亨貞吉位乎天位以正中也利涉大川往
 有功也

坎險在前阻乾之進乾剛遇險待時以動曰需夫
 需九五以一陽居二陰中則是陽陷於陰也何以
 光何以亨蓋九五以坎中履乾剛內有剛德眾陽

三百八十六
輔之有不陷之義曰需有孚光亨夫需天下須以
養也爲天下須非有孚君子剛健不息克盡中正
之道其能養惠天下而充其所以爲光乎貞吉以
中正吉也中正則道協天人治以光大險難聿濟
大功以立位乎天位謂五位在乾上必曰天位蓋
言中正之德足以格天云嗚呼中正之貴於君也
尚矣苟非剛健在內則違中失正注意聲色密邇
邪佞德衰政壞天下失望雖有其位與無位同聖
人於需柔辭有天位之稱謂不如是無以繼天而
大其養也其義不困窮言剛健者必治嗚呼人君
於需其勉夫剛而戒夫陷哉利涉大川往有功也

需出險而震陽德施矣是以有功
象曰雲上於天需君子以飲食宴樂

致中和於一已將以位天地育萬物君子得時之
心如此飲食宴樂蓋自養象非真爲飲食宴樂事
也夫君子豈徒求養其氣體心志而已哉君臣上
下同德一心相與臻乎至和之域庶幾足以盡其
義詩鹿鳴燕羣臣嘉賓詩先王非爲逸樂也小雅
首以此篇蓋政事之大者其二章曰我有嘉賓德
音孔昭示民不忮君子是則是傲言君臣務德不
務樂其心無須臾而不在天下百姓也雲上於天
利澤必下施君子觀象養其身以養人至九五需

於酒食則養人之功博矣雖然君子先天下而憂
 飲食宴樂雖曰取象而君子若有優游忘憂之意
 何也曰君子中和之養正所以盡其憂時心不然
 時未可為雖憂奚益天下序卦曰物穉不可不養
 故受之以需需者飲食之道也夫天下一飲一食
 之間繫命君子君子知夫天下繫命在我是以謹
 養中和庶幾不負天下而利澤及之於後夫子曰
 飲食之道非真為宴樂之事明矣
 初九需于郊利用恒无咎象曰需于郊不犯難行也
 利用恒无咎未失常也
 郊在邑外以邑視郊猶夫外也卦自坤變而初在

乾下為郊初去險最遠為恒其德咎无自生曰利
 用恒无咎蓋君子於需不以險遠且已在下位而
 於德或怠為所當為以俟天命其心不獲罪天人
 故无咎也坤陰也初變坤陰有乾剛德為未失常
 夫初惟不犯難以行險而欽慎戒懼不替厥德常
 若處險於需得矣豈比夫妄冒僥倖者所為哉
 九二需于沙小有言終吉象曰需于沙衍在中也雖
 小有言以吉終也
 近坎險為沙互兌兌口為有言惟剛中克吉剛中
 者必強為善而平裕寬大之德積於中故吉蓋需
 以德為本為臣於需非有裕大之德必競利急功

卷一

二十一

通志堂

昧於遠圖九二處乾中其德足以應五而衍然在中初無犯難心是以小有言而二五道同志合利澤必將大著於後故獲吉也且二非怠於濟需者惟急於德而緩於難以吾正直屈彼險醜需必濟矣

九三需于泥致寇至象曰需于泥災在外也自我致寇敬慎不敗也

居易則遠禍迫險則致寇敬之慎之法乾之三其免於敗君子必平其心平其政戒險也且夫剛健不中而前遇坎險是健以行險者也用健涉險必有邀功趨利之心啓敵玩寇之事敗亡無日矣敬

慎則知畏知畏則能自反而治在我庶幾可收保全之功於後為臣於需者戒之哉坎水為泥坎北方為寇坎險為災坎上為災在外互離南方禮為敬慎

六四需于血出自穴象曰需于血順以聽也

文王居羸里時為然陽健承坎坎血卦為血位坎下為出穴卦變坤為順以聽夫蒙大難而處以順舍文王其誰能之文王善處需者二陰陷陽四於位為不正然四互體居離中巽初以明順之德在坎險下且乾之剛健在內其道足以有濟聖賢事也論易者當通其變

九五需于酒食貞吉象曰酒食貞吉以中正也


需九五以剛德處乾上有中正大德而位天位九二復以剛中應其道足以養天下而納之中和曰需于酒食夫天下不能自養須聖人而養聖人非家至人給以養天下也君臣同心行吾中正之德於上而天下率化和氣肇豐年應酒食之需莫盛此矣蓋惟中正可格天而感人且天下須以養而有不中不正之為是必拂於天而逆於人災害禍亂之將作不旋踵矣民尚何所寄命哉五剛中德與位稱居險難在前之時剛健不息卒以濟難遂使天下蒙酒食養變憂嗟之聲為和樂之俗吉也

大茲五以中正位天位為貞坎在上坎天一之水物所生也為酒食

上六入于穴有不速之客三人來敬之終吉象曰不速之客來敬之終吉雖不當位未大失也

上處坎極而賴君子以出險用以終吉三陽在下協類上應為不速之客夫君子有益於人尚矣上六居險上在需又不當位以得君子為應猶未大失況當位而可行其志君子應之其事業豈不暴白於天下哉揚雄曰侍君子晦斯光窒斯通辱斯榮敗斯成且濟需在剛健上乏剛德而身履高位自安險中初無補於需曰入于穴惟三陽之來有

以強其志復其剛上敬以從之故其失未大終以
 獲吉也嗚乎當需難時已以柔居上而不汲引剛
 賢用以自輔賢者之來又蔑有欽敬之心德何自
 而明難何自而解是將淪入於險而不復出矣可
 不畏歟坎險為穴互離承之為敬



坎下
 乾上

訟有孚窒惕中吉終凶利見大人不利涉大川
 柔曰訟上剛下險險而健訟訟有孚窒惕中吉剛來
 而得中也終凶訟不可成也利見大人尚中正也不
 利涉大川入于淵也

訟自離變內卦變離明為坎險且乾陽居上其才

健其行與水相違險健而爭是以訟夫訟必思求
 其所以訟誠信之道虧而上下之情不通訟所由
 生也惟復誠信以杜絕其原且惕然畏夫情之窒
 塞而增修厥德以中息訟訟可弭也恃力必爭害
 加於人矣故曰訟有孚窒惕中吉終凶且自天子
 至庶人有敵必有訟兵爭辯詰小大不同為訟一
 也聖人以天下百姓為心不以一己喜怒為心君
 臣交孚於上而窒惕省懼惟憂中德不大無以革
 其心而化之是以薄海內外罔不率順天下坐受
 無訟之福訟上剛下險險而健訟此申言訟之所
 以為訟也心險才健烏往不訟春秋詰夷狄不一

足謂其險且健勢易以訟吾一日德衰政弛將起
 覺聲亂不可遏止譬人之身與其家一有不正且
 才力不勝訟由以生不反身而歸之正爭競是務
 為身為家害未易言矣訟剛自外來而居二二五
 各得中君臣以中應剛健至誠聿修德政而有以
 止天下訟險健者將易心為恭順彼知夫訟不可
 成必將順以聽命也利見大人謂九五九五中正
 天下訟待之以定見大人而誠信之道格其非心
 訟可息焉不利涉大川訟宜靜宜止徐繹其所以
 訟而以中正弭之冒昧以爭不思反已而自蹈險
 陷則無以息訟矣遯陽下降一變為訟再變為无

妄為有孚二陰陷陽為室乾健在上為惕二五俱
 得中為中吉訟必有眾起為終凶坎在下其行上
 與天違為不利涉大川乾陽居坎險為入于淵鳴
 呼遯二陰既升而乾陽自外來陷乎坎中於是有
 訟二陰小人象也小人用於時必紛紛生事為國
 起難非構利即黷兵非黷兵即朋黨非朋黨即沈
 溺禮文徒為聚訟小人行險而健不肯求安靜之
 福自非君臣有剛中之德斥而遠之充吾誠信以
 行其政令使四方莫之敢侮訟其入於師矣若夫
 徒有止訟心而剛中之德不修則君子必不用政
 事必不立四方必予侮是姑息而致訟之大者茲

不可不辯

象曰天與水違行訟君子以作事謀始

宇宙之內趣舍各殊如天與水違行然謀始所以靖之於先設為書契亦謹始之大者詩云迨天之未陰雨徹彼桑土綢繆牖戶謀始之大者蓋當閒暇無事時德立政行天下誰敢侮之舍此弗謀莫知為國矣嘗謂中國於夷狄義利趣操不侔若天西轉而水流東其能無訟幾希王者大正始兢兢然惟恐德政一日失以肇禍產亂是以謀之欲其蚤也

初六不永所事小有言終吉象曰不永所事訟不可

言也雖小有言其辯明也

訟戒在初初用柔故不永所事夫忿戾之心一起而能息之以順靜訟必不永訟諸爻率以柔獲吉聖人戒夫強復不悛紛紛口舌間不知自反而求其直也小有言終吉順靜而言息也順靜者天人所相厥理自明於訟吉矣四以互充應而為有言互離在前離明為其辯明
九二不克訟歸而逋其邑人三百戶无眚象曰不克訟歸逋竄也自下訟上患至掇也

剛險陷中而二陰挾之且卦體天與水相違二適在坎中遜陰乘之為間於上下君臣之間道固不

同小人讒謗之說蓋已得行矣是未易可以口舌爭也曰弗克訟而義有所不可必為也傳曰富而能臣乃免於難歸而逋其邑人三百戶恭德行也臣有恭德普其免焉事固有下訟上者乎曰臣不能自節以禮義而區區欲必伸其志於道不遜於天不順有致訟之理而刑罰所由加也是謂自貽伊戚曰患至掇云聖人著此訓明君臣之間道貴於同不同則疑疑則爭爭則亂自非賢哲之君子安能全身遠害以自立於無過之地若二之能逋其邑人者哉且九五中正主也二雖居險中而亦有中德所以發不克訟之義者自夫卦體之相違

明其趣向有不同耳乾陽變坤陰為邑人為逋三百坤數

六三食舊德貞厲終吉或從王事无成象曰食舊德從上吉也

有吉德有凶德舊德謂坎險之舊三雖位在坎上有互離體變坎險為離明曰食舊德食猶日月之食舍剛險用中順善居訟者貞厲以貞自守而不忘憂懼也懼而知戒居險可吉曰終吉或從王事无成不敢專也且為臣於訟其位過中而不敢專且能洗濯其心以從於上訟何自生坤傳曰地道无成而代有終夫臣而擅君之成命天人所共惡

誅罰之所必加也戒哉三得從上之吉去坎險之
舊用麗順之正變天水之相違非有剛明至德莫
至是矣九五剛中有事於訟為王事

九四不克訟復即命渝安貞吉象曰復即命渝安貞
不失也

四以乾剛乘坎上且下履遯二陰其位剛過依險
以動動必逆理而況夫過中失正暱近小人訟安
可克復即命渝安貞謂何渝變也變已剛強之心
以順上命且安夫臣道之貞以不克成其訟可吉
也互巽巽順為即命乾道主變為渝四位互離離
明是以能渝夫近臣而悔過易慮安貞於訟以順

從中正主其不為朝廷生事而惠利之熟及人亦
大矣宜獲吉也九四以息訟則德不足而用靜之
功庶幾無過舉於訟夫何失之有

九五訟元吉象曰訟元吉以中正也

履中守正仁德大孚息爭靜難何往不宜曰訟元
吉蓋聖人利天下之功在止訟不在治訟天下事
物之來無已其勢必有訟不思止而息之區區欲
用其治則智力將有所不逮矣夫訟必本於心之
相違惟九五所履中正得乾之仁視天下若一已
初無怒之疾之之意且其仁足以化天下而服其
心是以訟息而天下治以仁獲吉嗚呼中正不可

一日忘於訟久也中正則施為注措悉本於仁而有以當於人心天下誰不悅從故雖強大暴悍者亦將畏義欽服無所用訟況其下者邪故夫爭端之起嘗生於人主不知乎中正之道般樂怠敖自己啓禍是其不可不慎歟訟諸爻皆以柔吉九四雖剛亦履陰位獨五以剛中吉五君也天下訟待以決且君道以剛為正五方以仁德止天下訟非剛中則莫能至誠而勉修其德此又聖人立爻微旨

上九或錫之鞶帶終朝三褫之象曰以訟受服亦不足敬也

上以剛亢處訟極才健不中有擊柱論功之氣曰或錫之命雖自上其德非順類夫或者錫之也若齊威晉文在春秋時而天子錫以命服弓矢車馬云終朝三褫之服之不自安也鞶帶所以束身而用其恭上挾險不遜是謂不稱其服適足為己羞矣故曰亦不足貴也乾金乾衣為鞶帶互離離日為終朝互兌兌毀乾陽之數三為三褫



師貞丈人吉无咎

彖曰師衆也貞正也能以衆正可以王矣剛中而應行險而順以此毒天下而民從之吉又何咎矣

師凶事也師貞在德德足以結天下心以吾之德
 伐彼不德曰師貞已貞而後可以貞人也一陽在
 內德進而中為師之貞丈人吉者何丈人謂二丈
 人德智俱全之稱仁愛足以撫天下之命法度足
 以制天下之命謀猷足以託天下之命為丈人五
 陰有地十數丈人象也九二剛中羣陰歸之五以
 柔中付二剛外事俾因天下之心用天下之力以
 興大利除大害是能左右九二而使之用事於師
 得王道之要矣吉无咎者何師凶事也師若毒藥
 治病於元氣不能無少損惟丈人知夫元氣在國
 當謹養而保全之不得已用師將以濟民而去

害不殘民以逞欲也是以獲師之吉而可以无咎
 於後夫塗炭之禍非兵莫息然兵非有德智者用
 之利未及成而害已先及天下民之從之適以重
 禍是流毒天下非用毒以止天下之病聖人不肯
 為也師自坎變六五本坎五中位變坤之順與九
 二剛中應其德本同惟五柔順在中沈潛其剛以
 師屬二行險而順天人之心靡不悅從知其本心
 以利天下非害天下故曰民從之吉又何咎夫坎
 險為毒坤為衆可以王謂王道於是成二剛中五
 能用二王業以建也嗚呼陽來在一為復升二為
 師復自心起人君必先復其心使悉歸於中然後

能復其情性復其政事以從事於師不然已之無德幸一旦成祗亂天下非以利天下也可不察歟可不慎歟嗚呼惟復而後可言師

象曰地中有水師君子以容民畜衆

仁以養之義以訓之先王之兵也水居地中容而有制君子法象民欲容衆欲畜蓋不容無以得天下心不畜無以制天下命觀井田丘乘法師象見矣師五得坤中盡容畜義

初六師出以律否臧凶象曰師出以律失律凶也

以義舉以禮動以法制是謂師出以律弗善於此凶固宜也坎險刑法象為律夫師以禁暴止亂用

師失律是自暴自亂者所為何以禁止天下暴亂若火弗戢將自焚矣聖人之師以我之正征天下之弗正其出以律初以陰位坎下難作兵動之始也天下休戚所繫聖人故首發此訓

九二在師中吉无咎王三錫命象曰在師中吉承天寵也王三錫命懷萬邦也

難除而民安之莫大於中中生乎習中愛物之誠過中則殘不及中則不濟師而用中天人與之故吉王三錫命順命也蓋非徒寵數之蕃是欲全天下之民而生之若坤之生物然此萬邦心說而懷其仁也五處坤位中其為命順承天寵者何中格

於天天所眷祐王命三錫天其使之矣九二自乾
 來曰天寵且二以剛德為師一卦主六五履順處
 中俾二展盡其志五若無與於師然聖人尚德不
 尚兵不得已有師一付剛中臣為吾排患止難聖
 人知修吾德而已不肯以兵爭為已任而臨以剛
 也聖人可謂知所本矣湯伊尹周公太公得師之
 中二居下卦中曰在師中吉自五至二歷互坤三
 位曰王三錫命坤在上曰萬邦師柔爻皆具王家
 六五以乾剛而用坤柔變險以順仁德為大曰王
 指五言之師而若五王道顯矣

六三師或輿尸凶象曰師或輿尸大无功也

三位不中在四陰下有互震體而才德俱不足號
 令賞罰莫適為主是謂輿尸尸坤象輿尸有行師
 之名事不已出也百戰百北無疑矣此最用兵大
 戒夫三挾險而動才德既劣且有不肯為國任事
 心師罪人也

六四師左次无咎象曰左次无咎未失常也

六四乘坎險處互坤中靜順有常知師不可易為於
 是左次以全士卒之命左次不幾於慢命避事之
 嫌歟曰度師之不可進而不進是知彼此者所為
 也其為國家計至厚復何咎且九二以剛德為師
 主四守常足以輔二而濟其剛蔑有失矣晉士白

不伐齊喪而退君子大之楚伐陳吳季札帥師救之曰二國不務德而務兵遂旋師左次也四以坤順居五震上動而不失其靜且震位居左為左次六五田有禽利執言无咎長子帥師弟子與尸貞凶象曰長子帥師以中行也弟子與尸使不當也

禽害稼物田有禽姦宄寇竊為民之害者也用兵為有辭曰利執言夫正辭伐罪為天下止暴興利是亦足矣而爻辭止曰无咎何邪夫德政衰而後有兵夫兵凶器聖人不得已用之用得其人雖足以致大利而征役之起疾病之作創痍之傷財用之費所損和氣固多矣矧一失委任禍均天下其

利害豈不大哉聖人以兵為難故為見在辭而又丁寧分別致意於後曰長子帥師弟子與尸凶言師之用人不可不慎耳坤上為田五震震動為禽坎北方主信為執言長子謂二弟子謂三六五柔中得師之仁為利執言

上六大君有命開國承家小人勿用象曰大君有命以正功也小人勿用必亂邦也

君子尚義志在天下小人不然喜爭生事惟利是視安可任重於平定日邪其為國生事無疑矣師至上六師道已終聖人以勿用小人為戒且曰大君之命蓋大君必欲休息天下而芘其生民方其

為天下除害小人並用有不得已焉者患難既平
 摩撫養愛之不暇寧忍使小人用事於此時以動
 搖天下之情也哉曰大君言仁德之大也坤眾為
 家國三陰為小人坎至四變有互巽體故二曰錫
 命上曰有命以正功云者大君體坤順之德以安
 養天下為心不使小人任開國承家之責蓋所以
 成天下萬物之功且安養之功於是乎正曰正功
 云坤載物為功

坤下
 坎上

比吉原筮元永貞无咎不寧方來後夫凶

彖曰比吉也比輔也下順從也原筮元永貞无咎以

剛中也不寧方來上下應也後夫凶其道窮也

比孰為吉五陰協輔一心順從薄海內外罔不臣
 服比之吉也原筮謂何先王合天下之心以誠惟
 精神心術之間審而後動動必中理天下用是順
 比元永貞所以守此元仁也元故無失德持以永
 行以貞天下之比其有窮已哉書曰慎厥身修思
 永邇可遠在茲元永貞也原筮元永貞非剛中之
 主莫能行之蓋剛中則誠動於內不以天下既比
 而怠於修德以害其比是以无咎不寧方來既比
 之效也周公相成王遠服重譯至不敢一日寧處
 懼後時也羣陰俱應若水行地不舍晝夜曰不寧

方來後夫凶謂上上位卦外處衆陰之後曰後夫如書稱紂獨夫上之後時昧慢智不足以有見一夫之爲耳蒙曰初筮比曰原筮誠在內曰初在外曰原比之爲卦坎位於外原有再繹義於比而至誠審慎若此其有失乎比師之反一陽爲復二爲師三爲謙四爲豫五爲比聖人既復其心而有以除天下害於師方且法天用謙大功建立初無滿假自盈之心謙故豫豫故比然則比之功始於復用於師成於謙著於豫陽升至比而君臣之分大正君用剛臣用柔天子當陽權歸於一以總攬萬方於上而天下大比矣嗚呼盛哉君天下者可不

君仲

玩此而加勉矣夫

象曰地上有水比先王以建萬國親諸侯

水行地上小大相比卒以歸東功利及天下博矣先王法之建萬國以下比其民親諸侯以上比其君若身使臂臂使指小大相維順以聽命制得其道也且比不獨比其跡必將有以比其心而後天下常治不亂親諸侯比其心也讀蓼蕭湛露之詩先王待諸侯何其勤哉先王得比道矣不然利澤何以及天下後世若此夫初六有孚比之无咎有孚盈缶終來有他吉象曰比之初六有他吉也

處坤順下為有孚孚尚矣而比道尤貴孚天下未有不誠不信而可以比人且於人之比已其理必不久合也初六有孚在比先故无咎有孚盈缶終來有他吉謂誠信之德日充終必有應而應之不獨四曰有他吉居比初來比者眾且在已上者皆順德君子是可以相與有為於比矣宜其吉四陰中虛為缶坎水坤土相承為有孚盈缶雖然易貴正應而比以有他吉謂何比自下比上以親比為義且當天下大同時君子同心不專其應專其應則比道狹而不順比初六以有他吉大有初九以无交害易之變也易變因時不失其正

六二比之自內貞吉象曰比之自內不自失也

二柔得中內比初以成其中順曰比之自內夫君子惡夫暱比循私者若親比有德忠以事上在君子為貞而道可行於君臣已矣失曰貞吉曰不自失比道自近始二比初四比五取內外近比義六三比之匪人象曰比之匪人不亦傷乎

三居坤陰中其應在上上坎險曰比之匪人荀卿曰與不善人居如入鮑魚之肆久不聞其臭言不善足以移人知慮使流入邪惡也三以柔居剛位不得中識闇體順所應在上而跡所近比皆非其人幾何而不至喪身忘家也哉是可傷已坤陰為

傷

六四外比之貞吉象曰外比于賢以從上也

四位居坤上率三陰從五五賢君四能率類從五
是為貞顯比之功自四成之語曰君子無適也無
莫也義之與比況夫上有剛德之主從而事之功
以立貞吉孰大焉六四德位俱陰在比得臣道順
貞用以貞吉

九五顯比王用三驅失前禽邑人不誠吉象曰顯比
之吉位正中也舍逆取順失前禽也邑人不誠上使
中也

比至九五其道大成五以一陽主眾陰剛中而貞

且位居互艮上中正之道足以制羣陰而止之內
之中國外之四夷莫不效順是謂顯比王用三驅
失前禽邑人不誠吉聖人之仁德也古者天子蒐
田講三驅禮失前禽則違而去之者弗之取仁之
至也聖人以中正比天下其道既顯而荒遐之俗
猶有不化聖人增修德政而已不脅以武力曰失
前禽寧失之寬也失前禽正所以兼愛華夏之人
成湯祝三面之網諸侯聞之相率以朝得比之吉
邑人不誠謂內治著明不待誠令蓋聖人躬行之
德有以格之比至邑人不誠德足以洽其心矣何
患乎天下不比吉其宜哉坎北方為兵坎隱伏坎

弓矢為三驅上以陰在外為失前禽坤下為邑人
 坤順為不誠讀易至比九五知聖人緩於治外急
 於治內也九五以邑人不誠獲吉中以治內之效
 也失前禽則遐裔猶有未賓附者撫之以寬而遂
 其生仁德益大合是二美獲顯比之吉聖人於天
 下既比後不肯邀功生事於夷狄不毛地也後世
 若漢武唐宗窮兵極武於顯比失之然顯比而用
 三驅之禮是聖人亦不以天下比而忘武備也吁
 孰謂天下未比而備可遽忘乎

上六比之无首凶象曰比之无首无所終也

禹會諸侯塗山防風氏以後至誅聖人度其懷

不悛必將為天下害誅之不疑也上六位坎險上
 比終已獨失所附從是德不可以格化而必將至
 加兵故凶且上下小大相比在理為順不順何所
 容於天地間曰无首蓋恃險而莫知親其主云



乾下
 巽上

小畜亨密雲不雨自我西郊

彖曰小畜柔得位而上下應之曰小畜健而巽剛中
 而志行乃亨密雲不雨尚往也自我西郊施未行也
 小畜以陰畜陽六四居近臣位體巽順至德總攬
 羣剛而上畜於君曰小畜亨健而巽卦體有至健
 不息之誠而又將之以巽順畜其入矣剛中志行

謂四以巽順承五九五剛中六四比而承之其志
遂行健巽志行故亨密雲不雨德澤未施也臣之
誠意雖通於上而君德未孚若天氣未應曰密雲
不雨自我西郊者何陰陽和則雨西郊陰位自我
西郊言陽氣不應也然則小畜何以尚往曰臣事
君勉盡吾道而已不以未孚而怠其愛君心畜道
斯成孟子曰畜君何尤畜君者好君也小畜貴往
序卦曰物畜然後有禮小畜其必自禮始乎故夫
君行禮而天下率由於禮所畜滋盛矣小畜巽在
乾上巽居己巳乾上位也巽以入之畜乾之亢大
畜民在乾上艮居寅寅乾三位也艮以止之畜君

子之進夫畜亢不使其君復於禮君子之志也且
小畜大畜二卦異者五位耳在小畜則以剛中受
畜在大畜則以柔中畜賢二卦之義蓋人君體皇
極之道而沈潛其剛高明其柔者也剛中以厲進
德之誠故能受畜於其臣柔中以盡虛己之道故
能畜賢以畜下惟賢人能用易之中而動無不當
於理也陰居五陽中爲密雲互兌爲西郊必曰我
西郊云者我周之西郊也夫聖人之心豈不欲得
君行志霈膏澤於天下哉得剛中之主然後聖人
之志可行自我西郊聖人之難也
象曰風行天上小畜君子以懿文德

仲尼曰文王既沒文不在茲乎內剛外順為文德蓋中之發見夫事業者也其道則無不順於天人君子觀象於小畜思有以格君心而正之曰懿文德疾夫已德不充不能格也文王能懿文德而其德浸以光大化可上行於君矣巽為風為化巽在乾上巽柔乾剛為文德以一陰畜五陽為懿羣陽之美盡在於是云噫君子畜君必先畜已德惟文王之文為能行此吁以文王之德之美而終無益於紂豈以紂非剛中之主故歟吁為君而用心不剛雖有賢聖之佐莫可救藥矣

初九復自道何其咎吉象曰復自道其義吉也

小畜自巽變初以巽陰變乾陽而上應於四受四畜而能反身以歸道者也且居小畜初所復在道其行已操心必不悖於理是能自畜者也是可進為於小畜時矣故曰其義吉以陰復陽曰復自道九二牽復吉象曰牽復在中亦不自失也

初自巽復乾二於是得處乾中曰牽復不比於初不失厥中以比應九五同德之君其道必行故吉記曰或安而行之或利而行之或勉強而行之及成功一也二勉從初復得畜之中於已無失曰亦不自失云

九三輿說輻夫妻反目象曰夫妻反目不能正室也

九三剛過中且進不知止陰扼其行曰輿說輻乾
 健為金為園為良馬有輿輻象四履陰在前三以
 陽承四陽受畜於陰陰反制之失內外上下之序
 為夫妻反目互離為目巽多白眼為反目夫臣之
 畜君必先正身以正家而後畜道可行於吾室之
 不正是不能正身也規規然欲信其說於君上不
 能有行矣聖人於小畜九三示人臣自畜之道蓋
 能畜己然後能畜君天人相通之理也小畜雖以
 四為主而凡居臣位者皆上畜義故六爻取義各
 不同


六四有孚血去惕出无咎象曰有孚惕出上合志也

四五皆曰有孚君臣之際非孚莫畜蓋情不通心
 不同道不合姑相與順從於聲音顏色間畜無益
 也惟臣孚於愛君君孚於從臣各以惠利天下為
 心則君受畜而不疑臣效忠而不憂君臣之心若
 出於一大安大榮何咎之有四以一陰處五陽中
 有臣德之一互體離巽順而明用能有孚血去惕
 出言誠信之道行無復可憂事也蓋四志合於五
 羣陽並從蔑有能傷者周公歸相成王詩美之曰
 公孫碩膚赤舄八八正血去惕出象伏坎為血去
 互兌兌說為惕出夫履上位而身比於君君子歸
 之且以畜君為己任傷者必至若周公之管蔡是

四百廿一
也周公之德足以格於天而信於人是以成王終
悟志以上合而傷之者去其道豈不盛大哉
九五有孚孳如富以其鄰象曰有孚孳如不獨富也
君臣交孚王道以昌致之在臣孚之在君九五剛
中六四以誠德上交於五而畜之羣陽罔不順比
剛賢協從則天下歸心莫可解矣曰有孚孳如富
以其鄰且夫剛中之主而能受畜於臣不自矜伐
惟善是從至誠之感所孳者大且其富有天下卒
能使天下同其富也陽實爲富巽繩爲孳如四五
以巽順履乾位內剛外順陰陽交濟爲有孚
上九旣雨旣處尚德載婦貞厲月幾望君子征凶象

曰旣雨旣處德積載也君子征凶有所疑也
居上而畜道大成利澤以敷曰旣雨旣處蓋六四
九五其位近比陰陽以和至上爲旣雨尚德載以
德任重也婦貞厲守正而不敢忽也月幾望君子
征凶居此位當此時不可過也其周公還歸事乎
上九以剛在小畜上得君而澤加於民臣道至此
足矣聖人特勉之曰尚德載懼其或慢於修德而
不知積也曰婦貞厲欲其謹守臣道之貞不可一
日忘厲也曰月幾望君子征凶欲其用謙持恭於
禮不敢少越也蓋上九居五陽先於臣道疑若過
亢自非體巽君子莫知自畜而犯義矣周公不敢

寧上帝命尚德載也天命不易天難謀乃其墜命弗克經歷婦貞厲也公孫碩膚月幾望也周公肯越禮而行哉後世言臣道盛者必周公信矣巽木其象仁為德載長女為婦互兌在下兌納丁為月幾望



乾上兌下

履虎尾不啞人亨

彖曰履柔履剛也說而應乎乾是以履虎尾不啞人亨剛中正履帝位而不疚光明也物畜然後有禮故受之以履以禮行世孰能害之曰履虎尾不啞人亨兌西方為虎乾剛在上兌柔

承之以乾臨兌柔為剛履說順之性無所忤拂曰柔履剛柔履剛而上下之分定說而應乎乾謂至誠恭己以順天道履至此而禮行矣禮行於上姦息於下為不啞人亨然則君子出而有臨安可不慎所履乎剛中正履帝位而不疚謂何九五履乾正位曰剛中正中正者為能行禮九五剛健不息德同於天體大中至正之道以君臨天下禮化既行天下樂推不厭曰履帝位而不疚堯舜事也堯安安允恭克遜光被四表舜溫恭允塞重華協帝奚其疚互體離離日為光明為不疚吁涉世之患為可愕也繫辭曰吉凶悔吝生乎動吉一也而凶

悔吝三之故君臨天下者其可危為大蓋人君以一身撫御海內內而姦宄外而夷狄乘間伺隙欲逞其志不知其幾向使所履一不正而蹈於非禮則政令紀綱弛於上讒賊寇攘起於下若虎噬人不可制過人君其慎夫噬穆王命君牙曰心之憂危若蹈虎尾涉于春冰穆王周逸君也能不忘蹈虎尾之憂以戒其臣下況不為穆王者哉宜周室卜世長久也

象曰上天下澤履君子以辨上下定民志履莫大於禮禮莫大於分分明而天下不復有覲覲心曰辨上下定民志君子為此蓋亦有政教法

度存乎其間雖然行禮自身始乾天也君也其德則剛健而誠人君法乾之剛至誠行禮以化天下而又因天下之情以為之制不矯拂其常理是以天下說從民志以定履不取地而取澤澤氣上通其性說不若上天下地之否蓋禮必人情通說而後可久且澤水靜止象民志之定云

初九素履往无咎象曰素履之往獨行願也初以陽處卦下下無承之者而能為吾所當為不愆其素曰素履夫孝悌仁義忠信皆德之清明而履所宜常行者也素履既修往而獲應德斯施矣故无咎且夫君子修身不以已在下位而輒廢其

行蓋君子之志未嘗一日不在天下操行雖獨其設心則不遺於天下國家今日行於己皆異日施之人者曰獨行願充下兌西方為素下無所履為獨行

九二履道坦坦幽人貞吉象曰幽人貞吉中不自亂也

履道者其心安二得中下履初九曰履道陽以一下為道所履在道幽人之吉死生窮達視之惟一曰坦坦夫能定者能應況天下固有不可易之正理營營於中曾何補哉二居澤中陰掩之為幽人中正為坦坦互體離有明德而又得中二蓋臣

之能定者如是而後可任天下大事履六三亦以一陰而宗五陽而位不中正負凶德懷異心二適承之聖人故示大訓使後世君子知所法尚而履夫道也

六三眇能視跛能履履虎尾啞人凶武人為于大君象曰眇能視不足以有明也跛能履不足以與行也啞人之凶位不當也武人為于大君志剛也

柔為一卦主位乖中正德不足矣其欲以威力先天下者乎惟夫不中不正而負恃其才若眇之能視跛之能履是必以暴虐加天下天下亦將從而殘之矣曰履虎尾啞人凶反正俱兌兌毀折為眇

為跛互體離巽離為目巽為股虎踞必旋其尾履之啞人三位兌上為虎尾為啞人凶履虎尾一也卦以說應亨爻以不正凶得禮失禮之符也三本陰體居二剛上所履失正大哉夫子之訓斷然曰眇能視不足與有明跛能履不足與有行謂能視與無明同能履與無行同跡其凶暴之資方且為天下大害必不能有所建立於天下後世也武人為大君則以立志之剛用僥倖一時後世若西楚近似矣兌陰為武人以陰居五陽中其德不足其志則剛爻互離為大君為志上下俱陽為志剛夫以一陰總五陽所總者亦大矣惟履位不中德非

其稱是以致凶戒之哉

九四履虎尾愬愬終吉象曰愬愬終吉志行也

欽畏者後必吉欽畏則無失德而所履益修夫君子居上位戰兢臨履之心不須與忘之則其道足以通君而庇民志行何疑履兌為履虎尾乾剛不息為愬愬輔五決陰為終吉為志行

九五夬履貞厲象曰夬履貞厲位正当也

九五剛中而正羣陽歸之且以乾剛乘兌說有天

為天下百姓患此史履之旨貞厲謂貞其德厲其志德貞志厲史道乃成有為不可易也得乾中為位正當

上九視履考祥其旋元吉象曰元吉在上大有慶也稽天道以修人事是為視履洪範欽用五事視履之義旋歸也反求諸己仁德斯大而天人共喜矣曰其旋元吉元吉吉之大者上九位在乾上允說承之天應於上而人說於下宜其吉且視履聖人克己之學蓋履卦至上德成位尊履道已成方且汲汲益視所履而思有不合於天者必將正心誠已而求致其祥非剛健不息得乾元用九之道其

孰能至此哉上與三應三位互離中離目為視蓋自視其德之明與否耳允下允說為祥

紫巖居士易傳第一

後學 成德 校訂

紫巖居士易傳卷二 泰之觀

張浚



泰小往大來吉亨

彖曰泰小往大來吉亨則是天地交而萬物通也上下交而其志同也內陽而外陰內健而外順內君子而外小人君子道長小人道消也

坤變而乾陰往於外陽來於內陰小陽大君子小人之分也大來何以爲泰大來則自君及天下無不正至格天地裕萬物安中國服四夷宜其泰然則人君盍爲而能致大者之來其必自心始人君

之心剛於內則君子之有剛德者並進夫君之心若曰我之社稷將有以保之我之百姓將有以利之吾心勃然改不善而從其為善正念一興天地鬼神知之君子聞風孰不改圖而來乎使君而無有是念是陽氣未復夫未欲泰也君子知夫道之不同不肯違天以幸萬一得以危其身以敗亂天下國家陽自內來一為復二為臨三為泰至泰剛德成矣剛內為泰其心剛也於是剛德之君子悉處於內為心腹任要職者莫非君子罔有小人間之夫為人君而剛內柔外執德之中皇極之道斯為盡是必寡欲而無私必以社稷天下為己憂必能

斷而不惑於眾說小人將何所容跡哉往來自此判然則言致泰者在君心之剛而已泰治功利及天地萬物曰吉亨泰小往大來吉亨則是天地交而萬物通也上下交而其志同也內陽而外陰內健而外順內君子而外小人君子道長小人道消也申言泰之所以為泰也君子類進發號施令罔有不順人心者人心悅歸和氣可致故天地交而萬物通方春三陽用事天地之氣騰降於上下而萬物莫不奮達交通之應也而天地之氣得其正實自夫君子獲用於時何謂上下交而其志同君臣之志在天下而不在身是為志同上下交云者

君之心即臣心臣之心即君心相與以誠讒邪莫
 間是為交二事皆國有君子致之故曰則是天地
 交而萬物通也上下交而其志同也內陽外陰陰
 陽得正也內健外順君臣得體也君用健臣用順
 事無不濟內君子而外小人君子小人各當其位
 也聖人於小人也外而已如曰必絕棄之則姦心
 滋生為吾治害外之所以俟其化聖人之心仁矣
 大矣夫

象曰天地交泰后以財成天地之道輔相天地之宜
 以左右民

君子並進治道可行正心術而五行得其序敷政

教而萬物得其性自然民協于中致力於天地是
 致力於民也夫財成本自君心心正則身正身正
 則所為罔不正固有以格天地而均節其道其用
 微矣若夫輔相則見於政教之跡因天下萬物之
 宜而還以導之也箕子為武王陳洪範自五行至
 五福六極財成輔相之道畢備其中其曰斂時五
 福用敷錫厥庶民凡厥庶民惟汝極錫汝保極所
 以左右民者至矣坤象在外為民且陽下陰上二
 氣交感各得其中陽為左陰為右左右之而使歸
 中也

初九拔茅茹以其彙征吉象曰拔茅征吉志在外也

何取於茅以況君子有潔白正直之德而可以通神明也君子不後時以縮在泰必類而進為道為天下也曰志在外且上有柔中之君下有同志之賢進必合合必澤加於人曰征吉坤初變巽為茅三陽連進為拔茅為彙初應四而二剛俱上應曰以其彙征

九二包荒用馮河不遐遺朋亡得尚于中行象曰包荒得尚于中行以光大也

二有乾剛之德其容如天其公如天中道上通君心應之包荒用馮河容也不遐遺朋亡公也荒包則不才者勉馮河用則強暴者化不遐遺朋亡則

志仁身正臣道洪矣泰治之時君臣各得其志為大臣者孰不以天下為心且以天下為公哉二剛中知保治之難汲汲乎荒之包馮河之用不以遠棄不以近比所以作成人材杜絕私黨之意甚備宜得尚于中行之君也嘗考二之心處至治而競競若未治惟恐一夫失所一才見棄一事不公有以害吾治其為中也至矣事業豈不從而光大哉坤陰在上包荒象三比眾陰二承之用馮河象陰荒也陰在外包也陽剛不中馮河也應坤為不遐遺為朋亡乾中為光大

九三无平不陂无往不復艱貞无咎勿恤其孚于食

有福象曰无往不復天地際也

天地氣數中則平過中必變人事亦然聖人知幾示訓於泰觀山川陵谷之遷變日月星辰之推移平陂往復故不能逃氣數自然也夫治至於泰其君必驕其臣必怠其德必衰其政必慢斯亦自然之理不有剛德君子知艱守正不恤一己利害而盡誠以輔道其君俾知夫以泰為憂不以為樂鮮不顛覆於後也九三雖剛過不中而有乾健震動不息之體故勉以孚若曰盡在我之誠以啓迪弼正而不恤其他則泰治可長保也夫國家尊榮君子食人之祿可以無媿而道行志得利澤加施矣

曰于食有福乾坤相交而中進退盈虛自此分平陂往復所由生也互兌兌口為食陽為福互體震震以恐致福

六四翩翩不富以其鄰不戒以孚象曰翩翩不富皆失實也不戒以孚中心願也

三陽內升君子盛矣其道足以格小人而信之俾率類從化君子為天下圖何其遠乎夫小人未嘗一日無於世使之中心樂從君子之化是小人皆為君子也泰至是而盛四自內為三陰首下從羣陽其順若鳥飛有翩翩勢小人降心從君子象也知君子有可信之道其心若一不戒以孚安有害

治於後者哉陰下順為翩翩陰虛為不富三陰為鄰陰從陽為孚反兌為不戒

六五帝乙歸妹以祉元吉象曰以祉元吉中以行願也

帝乙古賢王稱也在易象取謙以下下之義甲十日長乙次也舍甲之剛用乙之柔非賢德之君孰能為之歸妹謂何應九二而并與三陽下之也三陽而謂之妹三陽自坤變有妹象也祉謂何福也治盛而天降之休曰祉六五為泰主以柔用中不謂既治而一日忘下賢廣覽博取惟恐英才一或沉於下其於天下之仁有加無已於此見其心矣

嗚呼賢者民之命天下賴以生也至治而不忘下賢英才繼進如妹之歸生化之功此為大曰以祉元吉云以仁而獲吉之大也

上六城復于隍勿用師自邑告命貞吝象曰城復于隍其命亂也

在泰以陰居上剛德不足而權移於下眾失於內否其反矣城復失眾也失眾何以守邦況用師乎勿用師云者當反已而自治耳自邑告命命自下出也命不由君其吝為貞且天下之亂莫大於權臣擅命而政出多門讀雨無正之詩可以槩見此最泰極之大戒嗟夫治至泰極荒淫驕奢所自生

也荒淫驕奢之主命必移於臣而天下之心失矣
內何以守外何以戰哉坤土為城復互兌互巽為
告命

坤下
乾上

否之匪人不利君子貞大往小來

彖曰否之匪人不利君子貞大往小來則是天地不
交而萬物不通也上下不交而天下无邦也內陰而
外陽內柔而外剛內小人而外君子小人道長君子
道消也

否三陰在內其象有二人君剛德消於內一象也
小人柔邪者畢處要位而擅事於內二象也蓋人

君剛德既消則小人乘閒緣類而進莫可止遏矣
孰為人君之剛遠聲色輕貨利捨一己之樂先下
姓之憂君之剛也否將有蔑貞之凶君子卷道而
懷可也故不利君子貞君子不用國非國矣天地
不交是陰陽錯亂萬物不得遂其生也上下不交
是君臣各有心其道不通為君者驕亢於上為臣
者蔽塞於下綱紀法度蕩然不復有也此猶可以
為國乎否泰內外卦體同也泰曰健順至否易之
為柔剛蓋君臣失德已見於事朝廷微弱諸臣強
大中國微弱四夷強大內柔外剛義也嗟乎君子
一不用於時大而天地細而萬物俱不得其理且

君臣各有心志不在天下曰有邦與無邦同夫君子為國輕重如此而世主貪一己私欲踈遠剛賢終莫悟也嗟乎坤內邦邑象也否以乾變乾君道也而坤陰變其內剛德消矣夫人君內無剛德則政失厥中小人乘隙以進而禍亂亟作否所由成也且致否者人也而否之則匪人不然何以棄君子不用自罹其禍夫用君子必治用小人必亂此亘古今不易之理今也舍君子而用小人其必以小人為君子矣茲非天奪之鑑而然乎聖人知其不可奈何而曰否之匪人慨歎之辭也變坤為泰變乾為否陰可消也陽不可消也坤變至三君之

剛德淪喪殆盡是以否一陰生曰姤二曰遯三曰否至否剛德內消矣小人得志引類而來亦聲同氣感之符也嘗考唐明皇在開元時侈心已萌於中若姤一陰之始生云楊李乘間進卒肇大亂人君慎夫心念之微哉

象曰天地不交否君子以儉德辟難不可榮以祿君子共儉律身不為時變否之儉德蓋隱德不彰可言不敢言可為不敢為高爵厚祿可致不敢致君子非忘君且忘天下也知夫言為之無益祇害其身而正道一喪將孰與維持振起之於後君子見幾其心仁坤吝嗇為儉德三陽在外為辟難陽

本內也而居外為不可榮坤邑為祿

初六拔茅茹以其彙貞吉亨象曰拔茅貞吉志在君也相期以守正是為憂君之深君子陽陽詩相招為祿仕全身遠害而已蓋君子為正之守所以存道道存而志可行且國有人為國終不亡矣茲亦不憂君者所為與曰志在君否三陰在內小人用事時也而初貞吉二否亨皆君子事何邪曰聖人不與小人在內勉君子使各盡其道也聖人仁愛生民不忍小人迭進以害其生其意不亦遠哉茅至柔物乾一變巽為茅三陰為彙初本乾體為貞茹根也初應四連四之剛與陽俱退貞可嘉也

六二包承小人吉大人否亨象曰大人否亨不亂羣也

包初承三俟時之復其事則吉其道以亨陳平用於漢狄仁傑用於唐二得中於否曰大人大人以道為任而識其大者不肯規規然自異羣陰中招怨取疑以害吾道也曰不亂羣否之二五何以皆曰大人否陽消陰盛卦也非智識洪大者為之扶危解紛天下終否而已二五得剛柔中聖人立此象勉後世君臣使不以既否而怠其道且君子俱退已獨進為體道之權不失其正此又二所以為大而亨於否也

六三包羞象曰包羞位不當也

三過中有互巽兌體於否為柔順不正且志在諛說者也羣陰用事三先之跡其不中不正之資欺天罔上妬賢賊民何所不至三順而處之不自以為羞曰包羞而仰視天俯察地終不能無歉於心也陽在外為包巽進退不果為包羞

九四有命无咎疇離祉象曰有命无咎志行也君奉天命以施令臣奉君命以行事萬世不易之理而否亂之時以剛德處近君位能承君命而大有為於天下臣之恭也其事為難四居互巽中巽風為命有剛德而巽順事上故能承命以動均福其類夫天下所同戴者君也近臣而挾剛以擅君

命於否是為權臣夫權臣天人之心所共惡而深疾之者其背道失心必遺害於天下後世何祉之離惟夫在否而以君命行志於道為順且君子同心致時於治並受福矣周公大誥書命皆本成王是以十夫翼予大難竟平曰有命心每有之不敢忽也其至誠恭順之意未嘗自用而忘君云三陽為疇陽實為祉

九五休否大人吉其亡其亡繫于苞桑象曰大人之吉位正當也


慮患若繫馬於苞桑者然苞桑民柔象也有國之本在民寧忍傷之傷之則危亡无日矣書曰若朽

索之御六馬為人上者奈何不敬繫桑之義也且
 休否之道在於安在於存在於治不待夫既否而
 後為也先事預圖此大人之所以吉與九五以剛
 中至德履乾位下六二之賢而應之君臣兢兢思
 所以保乂百姓於上無須與忽其否可休必致理
 也且大人休否之功微矣天下徒見其常安常存
 常治而莫知所以休之道詩曰迨天之未陰雨徹
 彼桑土綢繆牖戶孔子曰為此詩者其知道乎休
 否非知道者莫能也互體巽巽柔木為苞桑巽繩
 直為繫乾五為大人嗚呼民者國之元氣也人君
 一念在民則恣情悖理之事必不肯更為民之心

歸之元氣復矣否以休也人君惟患乎不能誠意
 以復其心心復而大人可格為用豈不大哉其亡
 其亡又以見其心念之正也

上九傾否先否後喜象曰否終則傾何可長也
 天地之理陰陽之運數極必反上九居否終以乾
 剛之德在上進德不已陽可復而泰也曰先否後
 喜且數之消長與德終始人君嘗因否極至時固
 有可傾之道苟非自強其剛德而以利天下定社
 稷為志優游玩日則怠樂是安否不可得而傾矣
 為君者其勉於剛不可歸之時而曰姑俟時之來
 也必若上九之剛而後否可傾可不戒夫互兌為

後喜



同人于野亨利涉大川利君子貞

柔曰同人柔得位得中而應乎乾曰同人同人曰同人于野亨利涉大川乾行也文明以健中正而應君子正也唯君子為能通天下之志

君子至明之德上同於天故能同天下而天下心歸之曰同人大同无私若天之公曰于野亨野曠大无適莫之地公道盛行大難以濟曰利涉大川利君子貞不正則有所不利君子秉文明中正之德天下所謂善與同好天下所謂惡與同惡欲與

聚惡勿施天下之心孰不服從是為同人之貞乾上為野乾健為利涉大川九五剛中為君子為貞柔得位得中而應乎乾曰同人同人于野亨利涉大川乾行也文明以健中正而應君子正也惟君子為能通天下之志申言同人之所以為同人也六二以柔中為一卦主而上應九五曰柔得位得中而應乎乾九五德同於天故不曰剛而曰乾夫以大中應乾而羣陽畢從則所同者大乾行謂其道不息難以健濟文明離體健乾體以禮交物物无不燭曰文明文明而用以誠之謂健中正而應謂五五以大中至正之道下應於二曰中正而應

二五應天下莫不應君子之貞不亦大哉夫貞天下所歸惟貞則以我之心為天下心欲惡靡不一且將合天下之志通為一矣曰惟君子為能通天下之志離火在人屬心為志

象曰天與火同人君子以類族辨物

不同同之非有至公至明之德何以克為自伏犧至周人各有族類而辨之則愚智處宜貴賤履位賢不肖襲情記曰非此族也不在祀典然則君子小人善惡凡以類同者皆曰族類而用辨大同之道也族類物辨天下以治則車書可同四海可一矣火性炎上與天同體同人取天火立象君子法

象則法其至公至明之德而已

初九同人于門无咎象曰出門同人又誰咎也

出而不忤於物故得物之情而可以用其同自為崖異怪傲之行誰其從之若靜退不出之愈也初履剛有離明德位居同人先而汎然能與人同無私黨偏係心是必將攬天下之情而用其同於後故无咎蓋君子之同非物我盡忘渾渾與世為一如莊老所為也彼將有以用其同於天下使天下各蒙其惠利不苟然耳二以陰在上為門六二同人于宗吝象曰同人于宗吝道也

二柔中為一卦主聖人嚴為之訓曰同人于宗吝

夫君子無意於天下則已君子而有意惠利天下非同人則莫為之助而所同之狹亦不能大有為於時且二以陰居五陽中羣陽樂同儻必欲捨剛陽惟柔陰之從則為我應者鮮矣又安能廣攬人才以輔成人主有大之業哉宜其吝象釋之曰吝道謂於道為吝也或曰應五為宗夫二五君臣位且五陽二陰非已宗也語曰如有周公之才之美使驕且吝其餘不足觀也已周公惟賢才並用不牽私黨道以盛行二其慎哉二居離中離麗必有所附其在同人不可不慎

九三伏戎于莽升其高陵三歲不興象曰伏戎于莽

敵剛也三歲不興安行也

離處乾下離為戈兵為伏戎互體巽兌巽以陰木生兌澤為莽變乾有重艮體為高陵三歲乾數夫二五正應三四以剛間之譬諸侯強大與夫小人才健害吾君臣正應懼聖賢同心而正道行於天下已不得以逞肆私欲非已之利者大可畏哉夫小人為身計不為國計不為百姓計設心不仁莫肯恤也三歲不興而象曰安行蓋以惡長不悛恬不知悔吁其可畏也夫

九四乘其墉弗克攻吉象曰乘其墉義弗克也其吉則困而反則也

此卷長傳卷三

十四

通志堂

四位近君而以陽居陰知道之不勝而能自反以歸義故吉吾於此見聖人之心許遷善因而反則謂不害其為同也九四乘離之剛離中虛陽包之為墉夫二五以中直相與天人與之義安可間義所弗克而反身從義棄前非圖後善是不拂於天地之心矣

九五同人先號咷而後笑大師克相遇象曰同人之先以中直也大師相遇言相克也

心通迹間其憂在先道之苟勝間何能為吁經天地理萬物莫大乎中直夫中直物可格也況於人乎中直則君臣之心本自相通何憂不遇同人本

離體而天之與火其德又同二五俱得中位是五之心即二心二之心即五心其為中直也大矣繫辭曰二人同心其利斷金同心之言其臭如蘭以離火乘乾金其心無所不通非強梗堅剛者所能閒曰斷金心同而發號施令罔不盡善曰如蘭互巽為蘭夫五二正應而二剛害之二剛方健已德不足必欲以己不正之心求合於上嫉媚有德排之讒之九五剛中心惟二同卒用相遇以一天下而靜其難可謂盛矣先號咷後笑何也以天下為憂至誠惻怛之意發見於外曰號咷君臣相遇道行天下有足樂者曰後笑憂樂在天下而不在身

聖賢之心也互離巽兌巽風兌說兌口為號咷為笑大師克相遇克言與之者眾所勝在道若師之克離為戈兵九五以剛處中離體在下羣陽從之為大師嗚呼君臣之間亦在夫勉已中直之心而已中直者無欺愧於天地為用至大故惟中直則君臣一心而可以大同於天下也

上九同人于郊无悔象曰同人于郊志未得也

邑外為郊遠人而同之於郊相與為澹泊寂寞之遊忘寵辱遠勢利悔無自生雖然君子之心未嘗一日不在天下使得位於時今日設施前日靜養功耳同人于郊志雖未得悔則无之其心初不忘

天下也乾上為郊邑內也郊外也且郊猶取於同人君子何適不用其同邪雖窮居約處而志同道合以琢以磨君子進德不謂居無事而輒已也



乾下離上

大有元亨

彖曰大有柔得尊位大中而上下應之曰大有其德剛健而文明應乎天而時行是以元亨

大有自乾變乾變而巽仁德以行所亨者大曰元亨六五蓋乾五尊位惟其以乾剛用離明體協大中上下羣陽莫不畢應曰柔得尊位大中而上下應之夫中者天下之所歸而況於賢哉剛賢畢應

所有者大是為大有剛健文明二體剛健善斷文明善應剛健而誠盡於內文明而禮盡於外合是二美中德斯大其位得乾之中曰大中應乎天而時行謂五求乾剛稽諸天道而用離柔離萬物相見於時為正為時行時行云者蓋以當有大之世非用柔無以得天下賢非得賢無以保天下大業時乎時不可違也人君仁德至是大矣

象曰火在天上大有君子以遏惡揚善順天休命如日之升明德普施明德既行則善惡各得其正而天休滋至矣夫善者天下所甚愛惡者天下所甚惡善必善加於天下惡必惡加於天下遏惡揚

善以順天下心是為順天天人之心本自一致也天心眷佑和氣致福休命之來莫可止禦人君大業其將永久不替夫火有揚之之義天有遏之之義詳觀此象而知善人之有益天下國家也善人在上天休滋至然則盍可不亟求之於微下而進用之哉卦自一變坤至五而艮止之四陽俱復是為大有陽善陰惡為遏惡揚善

初九无交害匪咎艱則无咎象曰大有初九无交害也初居四陽下曰无交害四居四陽上曰匪其彭何義也初未有位當大有時君子莫不欲進以行其道道之不行君子恥之懼利澤不及於人也故曰

崇禎易傳卷二

十一

通志堂

无交害若夫四處近君位苟非以中正絕類之道
 立人之朝則嫌疑讒謗之興殆不可遏止明哲君
 子欲全其道以利天下有所不肯為也故曰匪其
 彭雖然无交非初罪也四方體公忠事上有炎上
 之體初不得交曰匪咎惟艱以守貞安順義命不
 妄求合上必我知咎不長矣曰艱则无咎三陽在
 前其行也艱艱斯无咎聖人著此訓惡夫舍正應
 而他適也

九二天車以載有攸往无咎象曰大車以載積中不敗也
 處乾陽中乾良馬其德健變卦有坤體為大車臣
 之積中非一日事申積用能任天下之重如大車

載物沛乎其有餘裕曰大車以載有攸往无咎中
 者何總言之德也其目正也公也直也誠也恭欽
 也仁也善也凡德之美者皆曰中君子於中不可
 須臾忘閑邪去偽止私寡欲積中之道也積若水
 之積其積厚其負大舟必勝任矣二得乾剛正中
 剛故不息是以能積且在上有柔中君屈已下之
 羣賢並進而己獨得中君子志可新時也何往不
 利哉嗚呼中不積則敗天下事生民之命將無所
 託後之為臣於大有慎勿以既治而怠其中也一
 日失中天下被害可不畏與可不慎與

九三公用亨于天子小人弗克象曰公用亨于天子

小人害也

以直道格君非心而致君為堯舜之君大人事業
 五以飛屠離中五陽宗之曰天子九三剛健履位
 位居互乾中用能盡至公之道曰公公道盛行大
 治可永為國家之利無窮曰公用亨于天子小人
 弗克小人不能勝己之私不可與言公也三重剛
 立互巽初互兌下兌說巽順為小人嗚呼小人以
 事君為容悅無所不用其私為民之賊為政之患
 為國之憂是將壅蔽其君以毒亂天下者也使若
 斯人而居上位必為天下大害有大之君尤宜察諸
 九四匪其彭无咎象曰匪其彭无咎明辯哲也

盡忠於君無下比三陽之嫌非見幾孰能之四以
 剛德為三陽先且其位近承柔中之君儻挾羣陽
 以事上得无矯拂取疑之憂乎四匪其彭非絕棄
 賢才而遠之也心公道直不牽其私使人人得盡
 其道於上是謂匪其彭是謂无咎不然蔽賢取容
 將得罪天下後世咎之大者四位在離明先下履
 乾剛明足以辯得失禍福之幾而剛能行之曰明
 辯哲三陽為彭

六五厥孚交如威如吉象曰厥孚交如信以發志也
 威如之吉易而无備也
 君臣交孚以道則德修政立天下懽然遷善遠罪

而莫敢爲非雖荒服遠裔知所畏慕率從吾化初
不待征伐刑罰之施也六五自乾變內剛外明其
明足以知天下之賢九二剛中順而應之剛柔相
交一德以孚曰厥孚交如威如吉離爲火爲戈兵
爲威如夫聖人有天下大業政令教化之防不可
一日弛自古紀之六五威如象辭何取夫易而無
備傳曰百萬之衆不如一賢蓋賢者立人之朝則
衆賢從而輔之君正於上綱紀法度明於下君臣
相說德威遠揚四方莫敢予侮不必屑屑然事備
具之末非謂壞法亂紀漠然无以備也卦本乾體
乾以易知曰易堯舜之時君臣惟道德是弘民不

犯有司蠶夷率服威如也堯舜安用備惟其君臣
交孚所備大矣信以發志謂何夫君臣而一有欺
愧之心必不能相與合志而有爲君臣之間宜先
勉夫信信立而志發於外斯有合矣五柔中爲無
備離明中虛爲信爲志

上九自天祐之吉无不利象曰大有上吉自天祐也
上九以乾體位離明上剛健有明德故能上賢而
自天祐之夫子繫辭釋之曰履信思乎順又以尚
賢也蓋信順可以得天人心信順一體事順天者
必信於人上九體信順在上又能以此尚信順之
臣君臣遇合其道盛行而惠澤加於天下是以自

天祐之吉无不利爻獨曰自天祐之繫辭兼天人而言天無心以人為心人之所助天其祐之也昔夫子對子貢足食足兵問謂兵食可去民無信不立蓋號令賞罰舉措之間一失其信天下將漠然離心莫可復合雖有兵食無補於用是逆天者所為何以得天下之賢與之共保有大之治上九躬履信順剛賢畢應人既助之天道斯祐其吉大矣互兌承之為履信乾五變得坤卦復於乾坤伏其下為思乎順

艮下
坤上

謙亨君子有終

彖曰謙亨天道下濟而光明地道卑而上行天道虧盈而益謙地道變盈而流謙鬼神害盈而福謙人道惡盈而好謙謙尊而光卑而不可踰君子之終也

自天子至庶人未有不謙而能保國持身謙則虛虛則久久則光大之道也惟有德者為能謙卦體內止外順德盛而止於內禮恭而順乎外是為謙无德而徒為卑順焉禮之文也君子用止於謙凡外物之役吾心意與夫窮通得喪之分好惡喜怒之節飲食言語之宜處之不競守以至虛節以禮義持以退抑天道所喜神物所祐民人所歸其為亨也大矣艮在下艮萬物終始為有終天道下濟

而光明地道卑而上行天道虧盈而益謙地道變
盈而流謙鬼神害盈而福謙人道惡盈而好謙何
謂也天地人一道幽明一心滿招損謙獲益猶朝
必有暮冬必有春乾上自剝居謙之三曰下濟而
光明光明艮體坤三自剝居謙之上曰上行陽止
於外而在坤上為剝陽止於內而在坤下為謙觀
一陽升降天地人鬼之情狀畢見矣聖人立象繫
辭於謙九拳拳蓋使天下後世俯仰動作之間不
敢須臾忘謙而思所以善其後也謙尊而光卑而
不可踰君子之終也君子德盛禮恭以充盡謙道
故處上而人樂推之居下而天下後世視為楷式

周公孔子為然周公令德久而不替有終也然則
聖人何為而臻此其必曰性止而德極於盛體順
而禮極於恭故歟九三以陽處艮上為尊為光位
在坤下為卑為不可踰周孔一道用之尊則光用
之卑則不可踰惟所用也

象曰地中有山謙君子以裒多益寡稱物平施
推其高剛而心止乎順然後能行禮於身以盡夫
謙禮行於身斯可以行於天下矣夫順天地鬼神
之道使天下遠害而就利必有禮制存其間艮有
止限義而坤道主平若井田行而王道盛無他聖
人用謙於身又率天下而納之謙大功以立大治

以成謙用大哉昔先王制禮使賢可俯而就不可
可跂而及貴者不至驕賤者不至汙無有餘無不
及用此道也雜卦曰謙以制禮地中有山山得其
平斯蓋制禮之象

初六謙謙君子用涉大川吉象曰謙謙君子卑以自
牧也

其身謙其心謙內外俱進非靜養之功何以至此
且人不能盡力於謙本夫放心不知求放心則驕
亢怠傲將一肆心之所為其能行己以恭而有所
建立於天下乎君子止心至靜不撓不奪其積功
非一日欲忿畢除誠信益大故德止於內而盛禮

順於外而恭謙之又謙可以得天下心而濟其難
卑以自牧蓋君子止心之道必曰卑云者遜志之
學惟遜志不矜伐用能自牧謙謙之德本夫自牧
初以柔處艮下體又承坤為謙謙互坎為涉大川
上坤下艮坤為馬為牛坤為地艮為山為自牧

六二鳴謙貞吉象曰鳴謙貞吉中心得也

二以柔德居艮止中德積於中謙形於言其所以
感動上心莫非至誠忠厚有益國家之論非諛說
無益之辭曰鳴謙貞吉二何以貞惟中心自得
不畔於道是以貞貞則得君而道行天下是以吉互
坎坎水為鳴謙坎陽在中為中心

九三勞謙君子有終吉象曰勞謙君子萬民服也

君起

有大功而不自以為功者禹不矜伐周公孫碩
膚二聖人者皆獲有終之吉三自師來曰勞謙夫
勤勞王家臣之常分也矜伐之心一生則恃功忽
下安寵擅事天下之爭所歸非所以自全也其能
保有萬世令名而服天下之心乎以剛陽居羣陰
中為君子艮終始為有終坤象在上已下之為萬
民服

六四无不利撝謙象曰无不利撝謙不違則也

謙至四德成矣上承謙恭不伐之君下履功德盛
大之臣撝其謙而散之不陵上不瀆下動皆中理

臣道斯盛艮下互體又艮艮手為撝謙不違則謂
何撝謙疑有失中之舉惟德成而動容周旋中禮
故不違則四以六居位得坤道正且德順有常撝
謙孰利互坎坎法律為則嗚呼若四豈徒能保守
其爵位而已其敦厚有容之德殆將使天下後世
一視以為法而安靖國家之福何可量哉
六五不富以其鄰利用侵伐无不利象曰利用侵伐
征不服也

履天下大位而不自滿假以親比上下上下一心
不服可征五柔中得順止正且剛中羣陰莫不協
輔謙德為大然則五猶有侵伐何也蓋姦宄害治

通志堂

治世所不能無惟謙德之大天下屬心用能正天下之不謙以成其治舜命禹征有苗舞干羽格之初不待兵刃之接无不利也互坎在中坎陰為不服為侵伐夫聖人用謙蓋將以收天下心而除其為天下害非徒徇謙德虛名而優游玩日不恤生民之罹毒也君人而欲得志天下莫若反身而求其謙惟謙則不自滿假而謂莫我若必欽必畏必恭必儉必親賢必聽言惠澤及人者大上下順服歡若四鄰用於侵伐何往不利羣陰為鄰坤地生養萬物為富

上六鳴謙利用行師征邑國象曰鳴謙志未得也可

用行師征邑國也

二鳴謙應五也上六鳴謙將以率天下而納之謙五曰利用侵伐上曰利用行師利用云者於用為利未必用也征者正也以我之謙正彼不謙聖人必欲大其謙於天下先自內始曰征邑國文王事也文王居岐謙德著聞伐崇崇違之退修德教而崇降其征邑國之謂乎志未得云者天下未由於謙聖人所憂也坤為牛為馬曰鳴謙坤為眾曰邑國邑內也上六正應在三三以剛陽居互坎中有負恃懷險心為志未得

坤下
震上

豫利建侯行師

彖曰豫剛應而志行順以動豫豫順以動故天地如之而況建侯行師乎天地以順動故日月不過而四時不忒聖人以順動則刑罰清而民服豫之時義大矣哉

陽德內升順道而動其動也因天下百姓之心天下悅之建侯以共治行師以除害安往不利曰利云者有是象不必有是事蓋陽動於地羣陰協應天地中和之氣達矣是為豫豫惟順動故治可興害可去而豫治益大坤震位上下為侯四自師來為行師剛應而志行謂四也九四以剛獲羣陰應

而其道上行曰剛應志行云順以動豫九四致豫之道豫順以動故天地如之而況建侯行師乎言豫之順動上可與天地合其德建侯行師之利蓋理之必然無可疑者天地以順動故日月不過而四時不忒聖人以順動則刑罰清而民服豫之時義大矣哉申言聖人合德於天地者如此夫天地之動無心而行以中氣未至不先之至不後之是以日月四時得其正聖人法天地因人心之中而用吾之中以有為於天下道無不順刑罰可省民心說服曰刑罰清而民服刑罰不清則中和之德不能純被於上下民之從之革面而已故豫以刑

罰清為大雷動於上坤順於下為天地以順動震
 春陽用事時以序行為四時不忒互坎在中為日
 月不過坎水為刑罰清坤下坤眾為民服且陽乾
 自剝來一曰復復心之剛以復其德也二曰師德
 復而後可以去天下害也三曰謙聖人德大功立
 不自矜伐以來天下之善也四曰豫陽氣奮達利
 物之功益著樂所由作也五曰比天下順比王道
 至是而盛也六曰剝守中則比過則剝剝聖人之
 戒也中其至乎君用之仁也嘗考一陽之生自復
 至比皆有兵戎象復上六曰迷復凶有災菁用行
 師終有大敗師九二曰在師中吉六五曰田有禽

利執言謙六五曰利用侵伐上六曰利用行師豫
 曰利建侯行師比九五曰王用三驅失前禽蓋陽
 動而復天威已行至比則威德益著而生物之功
 至大聖人生物之功在兵兵以德勝聖人復其心
 以復其德復其政事然後可以行師之眾正可以
 舉謙之征伐可以體豫之行師可以講比之三驅
 此一陽用事之序也夫天下順比而不忘三驅禮
 焉聖人仁愛天下惟恐一朝備弛而害加於百姓
 後世天下始定儒者急急偃兵息民之說以從事
 夫禮樂之文導君驕奢縱逸之地卒至敗人之國
 豈不陋哉若夫天下未定而曰我無事於復玩歲

樂身以兵為諱吾不知危亡之日矣戒之哉

象曰雷出地奮豫先王以作樂崇德殷薦之上帝以

配祖考

先王躬行之德洽於天下百姓之害除而天下大
悅樂於是可作樂由陽來樂作而德益崇夫使天
下率由禮樂之化是先王有以生之先王聖德日
加於天下後世不知何時而已故曰作樂崇德云
薦上帝歸功於天也配祖考歸德於祖考也帝出
乎震震在卦上為帝二陰在震上為祖考上帝曰
薦薦以盡誠祖考曰配配以合德

初六鳴豫凶象曰初六鳴豫志窮凶也

諛說之志萌於中發於聲音顏色蓋小人陰柔至
甚而無持操者是豈惟安逸豫以害其身推是心
以往且將害家害國害天下故凶初以柔處坤下
其志委靡不振以己不正資幸四應惟諛說之圖
而四有剛德不已合是以志窮而凶夫初本震體
用震變坤失其剛矣剛德一失邪枉若是吁可畏
哉震動為鳴聖人於豫首發鳴豫戒蓋方天下安
樂無事諂佞者易進聖人致戒於初不惟使小人
知所懲艾欲天下後世之為君臣者深察而欽遠
之也

六二介于石不終日貞吉象曰不終日貞吉以中正也

靜故能照夫當天下說豫時諂瀆以交上下不比
 於權即暱於諂馴至喪身亡家亂國無疑矣豈為
 先見者哉二有靜止至德道之光明足以見幾於
 先曰介于石不終日貞吉或曰二履人臣正位而
 介于石若安靜无補於豫者得無過乎是不然夫
 天下說豫人各循其所說而不虞後害古今一情
 也二處坤位中立德止靜之地而智足以見天下
 幾上不諂於九四下不瀆於二陰厚德鎮浮存豫
 有移風易俗守正止難之功為用至大夫子著上
 交下交之義於繫辭蓋以卦之上下言之互艮艮
 為石震再變有離體為日貞吉謂以中正獲吉豫

九四有權臣象天下說從禍福之分在四所處正
 不正閒吁為四亦可危也不有中正君子若二者
 孰能行禮於身以杜絕未萌之志而正君臣大義
 哉若二陰小人諛說之雄安可邇邇之喪德必矣
 繫辭曰君子知微知彰知柔知剛萬夫之望聖人
 深以二有功於豫謂天下後世宜仰望以為標準也
 六三盱豫悔遲有悔象曰盱豫有悔位不當也
 仰而視曰盱三位不中正以陰比陽切切然覬望
 之意見眉睫間曰盱豫悔而四方為由豫主遲其
 行又無以趨事赴功曰遲有悔然則君子處此如
 何惟自反以修德而已德苟中正上必我求何盱

遲足云聖人惡夫在豫求之人不求之已殆為容
悅計者設此象以示悔之必至也震再變離離為
目曰盱在坤陰上陰性緩曰遲

九四由豫大有得勿疑朋盍簪象曰由豫大有得志
大行也

姬旦總羣臣以輔成王誠信而已矣惟其待天下
以不疑是以得賢才之助而永保功業漢霍光反
之不再世而丹族吁可戒哉夫疑心一萌於習中
天下士將望望而去之孰與輔其德成其治乎曰
勿疑言疑之不可一朝而或生於心也衆陰歸之
由我而豫為由豫為朋為大有得坎中為勿疑

陽為首為簪衆陰為髮夫四以陽德孚五陰惟履
位不正聖人故有勿疑之戒懼夫誠意或怠以失
天下之賢極言誠之不可已耳夫衆賢協歸則上
可安宗廟次可安百姓下可安吾身疑心一生合
者將離尚可以致天下之豫哉夫惟盡其在我之
誠使無愧於天地無欺於幽明若雷動而奮仁德
以行天下之賢其將合志同心以赴事功之會而
我之德業永永無窮矣豈不美夫且近臣何疑哉
不過曰恐賢才之勝已而扼其進自非有至謙之
德而以天下為心不以一己失得為心能勿疑乎
九四自謙來宜其由豫而大有得志以之行也

六五貞疾恒不死象曰六五貞疾乘剛也恒不死中未亡也

嗚呼人君惟不安於逸豫則志明氣清其德剛健大臣烏得以擅事於下六五以柔履中剛健不足四承之曰貞疾蓋柔道多牽雖曰柔中而衆柔位上下在豫必怠宜不能有為天下也周室東遷則然五猶居中位曰中未亡其以先王德澤尚存乎互坎坎心病為疾震於稼反生為不死夫五以四豫聖人有貞疾之訓聖人戒豫之君必欲勉進剛德以總攬權綱於上不當安於豫怠倒持太阿以授其臣春秋尊王之義也且豫惟四履陽位羣陰

剛德不足不能為五助孟子所謂一薛居州獨如宋王何者也是以五不免夫貞疾嗚呼人君慎無厭夫剛德之賢而亟遠之使朝多君子君其有不尊德其有不修國其有不治雖有任事當權之臣不能私已而擅其事矣何貞疾之憂乎

上六冥豫成有渝无咎象曰冥豫在上何可長也陰極為冥性移志昏故冥成有渝許變也書曰惟狂克念作聖有渝之功也上處震上震動曰有渝云夫冥而渝猶庶幾可保其宗廟社稷也不渝渝亡無日矣人君其戒夫豫而不知反者哉



震下兌上

隨元亨利貞无咎

彖曰隨剛來而下柔動而說隨大亨貞无咎而天下隨時隨時之義大矣哉

隨否之變剛自乾來下坤之柔曰隨一變隨再變歸妹三變泰隨大亨利在貞不貞則無以率化天下而天下莫之從曰隨元亨利貞无咎夫剛來下柔民心以孚有所不動動則說矣是謂隨蓋民之繫命在賢下柔則賢者獲用而得民之心用是以動天下其有不說從而率化者哉大亨正无咎而天下隨時謂得賢而民心歸亨大以正且夏忠商質周文聖人不能違天下心惟正故天下樂從而

莫違其教化然則天下所隨者時也時實聖人爲之是天下之隨在聖人不在時聖人貞動天下說隨其義大矣且天道之運自春徂秋歲功以成天下日用而不知隨焉而已若夫聖人以貞動而使天下欣欣從而化之亦若人之隨時於天也象曰澤中有雷隨君子以嚮晦入宴息

潛神至靜之地而後能盡動說之道於隨莊子曰淵默而雷聲神動而天隨從容無爲萬物炊累焉蓋靜者動之基潛陽之德養於至靜動以利物其動乃說君子嚮晦宴息蓋隨時而養之以靜也君子存身於靜其動也仁天下說隨大功以著兌西

方為嚮晦互巽為入互艮為宴息互震至允息伏
 曰澤中有雷嗚呼天地以至靜之德生養萬物君
 子以至靜之德生養天下傳曰君子有四時朝以
 聽政晝以訪問夕以修今夜以安身夫安身而後
 動則清明在躬平旦之氣不昧而利物之仁大矣
 此君子用隨於一日之間者然也可不慎夫

初九官有渝貞吉出門交有功象曰官有渝從正吉
 也出門交有功不失也

君子動靜本道惟道之從事雖變渝於道常貞得
 所隨矣故吉出門交有功謂如是而後可有為於
 隨也蓋吾之所隨既貞功利何為而不及天下哉

初從乾上居震下為有渝互艮為門初本乾體乾
 道也貞也自震以往萬物滋生為有功交謂應四

六二係小子失丈夫象曰係小子弗兼與也

隨道在係夫正否且隨匪其貞在我則德損在事
 功則必不能建立在天下則必不能惠利可不慎
 擇歟二柔中無失德然於隨用柔柔道多牽曰係
 小子失丈夫謂舍五正應係初也且初於隨為動
 說主何以謂之小子初自乾上居坤下在卦體得
 動說貞卦曰隨自初發也若文言其變則初位在
 最下有互艮體為小子係小子失丈夫惑彼動說
 捨吾正應是失隨之貞者也失貞何以從事於隨

聖人繫六二象辭曰弗兼與也以二在隨居人臣中位舍應與初義有大不可者其戒夫居陋而不誠心一意以事其君者歟四五以乾陽在上為夫六三係丈夫失小子隨有求得利居貞象曰係丈夫志舍下也

捨初從四四以道事五因四以通五志必行於隨隨有求而得者也利居貞謂何臣事君有君而已惟道惟君之隨人臣大義也其可不安而行之三繫四而曰利居貞者蓋聖人深著不可附麗權臣之戒夫四事君以道三之繫四本以通五求而得之貞莫大矣志舍下謂舍初互巽巽入為求有得

九四隨有獲貞凶有孚在道以明何咎象曰隨有獲其義凶也有孚在道明功也

伊尹周公臣也而實受天下隨處伊周任重甚難其道雖貞其義則凶惟至誠守道動皆中理則君信不疑功可成矣伊周事業卒暴白於天下後世誠也且已孜孜然正心欽己日以匡國家利天下為事譬日月在天有目有趾莫不待以成功何咎復得哉故曰有孚在道以明何咎而象以為明功也蓋有孚在道則動必中道事業日著是為明功九四居動說相應中有互艮體艮手為有獲艮剛止於中為孚為道艮其道光明為以明

九五孚于嘉吉象曰孚于嘉吉位正中也

中德日修賢者信之惠然肯來曰孚于嘉賢者隨之則天下莫不隨矣傳曰天下之父歸之其子焉往故吉嘉指二二柔順中正在隨為嘉不然君臣俱剛何以隨惟剛柔相濟而以中率天下隨隨道亨矣二居震中萬物自此趨亨嘉之會為嘉五以兌中應二陰陽之氣各得中相應是以孚也上六拘係之乃從維之王用亨于西山象曰拘係之上窮也

既拘係之又維之人之說從有不能自解也固結人心本於仁太王去邠周業以昌王道以行上窮

云者若太王事之以皮幣犬馬珠玉不得免焉也太王其事窮其道通自三至上互體皆巽巽為繩故有拘繫維之之辭上六居動說上天下樂隨而所履陰位以陰在上志未行於隨曰上窮



巽上 艮下

蠱元亨利涉大川先甲三日後甲三日

彖曰蠱剛上而柔下巽而止蠱蠱元亨而天下治也利涉大川往有事也先甲三日後甲三日終則有始天行也

天下事至陵遲大壞莫可支持自人君心念始君心不仁而奢侈暴虐之為流毒天下則邪佞得志

忠良退黜日復一日綱紀浸弛蠱之為由心起也
 坤柔下消乾剛仁心淪失泰治以墮風化於是衰
 矣必復其心蠱乃可治蠱以元亨元仁也蠱元亨
 利涉大川將有事於天下以正其弊大其治也故
 涉川為利序卦曰有事而後可大變巽互坎在中
 為利涉先甲三日後甲三日何謂治蠱在仁德在
 挈綱領而圖其本在不息甲十日長仁也萬事之
 本也夫事之弊壞非大振其綱領而務以仁德洽
 天下使天下歸心則事莫之興起先甲三日要終
 而思其弊後甲三日圖始而慎其行終而復始法
 天之健可以致治乾納甲先三日巽初也後三日

艮上也治蠱者可以復泰巽一變為小畜乾在下
 四變為无妄乾在上先甲後甲象也蠱剛上而柔
 下巽而止蠱蠱元亨而天下治也利涉大川往有
 事也先甲三日後甲三日終則有始天行也人君
 剛健篤實輝光日新其德事矣蠱惟剛上而止柔
 下而順為君者高亢而德日消為臣者邪佞而權
 日盛臣順而諂君止而怠治道以墮蠱之所以蠱
 也且夫剛上柔下巽而動為恒震巽剛柔相配陰
 陽各得其位是以有常而亨也剛上柔下巽而止
 為蠱少男在上長女承之陰陽失其序拂其常譬
 夫柔順之臣有以蔽惑其君而君安之不蠱何為

哉聖人觀象治蠱用巽之仁復艮之靜仁德既止
 天下率化而蠱可亨曰蠱元亨而天下治曰元亨
 云者仁而後亨蠱以仁亨也如是而後可以大有
 為於天下巽一變乾為天行巽木為利涉

象曰山下有風蠱君子以振民育德

作成人材以興弊補壞周宣用之夫人各有德顧
 在上者養之如何耳先王盛時學校興禮化行終
 致天下之材不可勝用振而育之之功也且山下
 有風失其常度非長養萬物之風也譬諸風俗陵
 壞於天下君子觀象將以復風化而大變其俗育
 德其可緩哉

初六幹父之蠱有子考无咎厲終吉象曰幹父之蠱
 意承考也

行巽之權陰救其弊而實顯其美曰有子考无咎
 坤上來居乾下為幹父之蠱乾初在上父象也夫
 初以巽仁居蠱下有仁德以治蠱而欲一大變其
 風俗其意專在尊宗廟定國家育民人子道既盡
 考德以大是謂有子是謂考无咎厲終吉戒以誠
 勉也厲而吉可終矣初柔順非厲則德莫之進位
 去上最遠曰意承考

九二幹母之蠱不可貞象曰幹母之蠱得中道也
 事繼世主而事適墮壞求以治之其道貴中不可

過過則失中且強所難能卒不可行何益於治周公相成王善用其中終能大文武之業不可貞謂不可過貞非直謂貞道不可行也故夫子明為之訓曰得中道云二以剛居巽中是謂得中道

九三幹父之蠱小有悔无大咎象曰幹父之蠱终无咎也為子為臣剛中是貴剛不可過然在蠱剛過猶愈於裕三剛過中與上敵應事固有力爭必行者故小有悔惟其設心立意本於治蠱而卒歸於正是以无大咎然則人君用臣於蠱寧取剛過無取裕裕何以立事而保其社稷人民邪

六四裕父之蠱往見吝象曰裕父之蠱往未得也

蠱至四巽極而止故裕西漢公孫弘以阿容無補君臣之間吝道也夫居上位不汲汲救天下弊玩日偷安以幸其無事不仁莫大若是者民將視之猶仇讎謂不我恤也何往而得志於君哉陰止於下有兌說體為裕上本乾位故二四五皆曰幹父之蠱

六五幹父之蠱用譽象曰幹父用譽承以德也承以德不承以事故用譽且舉行政事末節孝之細又安能有惠及天下且有令聞於後世哉五得柔中其位艮止巽上心止於仁臣剛而應用能修德於蠱以來厥譽夫天下之事委靡弊壞莫之振

起究其本原在德不在事德失則事弛德修則事立君人者欲顯親而大其業以盡夫奉先寧親之孝莫若反己行仁勉夫在我之德互允為譽

上九不事王侯高尚其事象曰不事王侯志可則也不有其功記曰終事而退臣之厚也位居艮上艮止為不事王侯伊尹復辟告歸體此也後世若漢留侯天下已定奉身而退庶幾高尚者哉不然已在上位無補天下國家而曰我姑退是足為高乎上九自乾來有剛健果斷之德且盡至上仁德已孚天下已治君子潔身而去以順天道可也不然咎將及之志可則謂何功成身退不牽寵辱志在

利天下而不在夫享天下之利進退有度其志可則變巽有離體為志



兌下坤上

臨元亨利貞至于八月有凶

彖曰臨剛浸而長說而順剛中而應大亨以正天之道也至于八月有凶消不久也

乾陽序進以復其位至臨而二陽生於下剛德內充足以有臨元亨利貞乾四德也臨有復乾之道而乾德未備其見於用者大亨以正而已故彖辭別白言之八月有凶戒也陽長而臨已戒陰生聖人知幾自昔保天下者率兢兢堯咨舜舜命禹皆

曰四海困窮天祿永終懼有凶也推是心以臨天下又安有失德於身者乎自此至遯歷八數曰八月剛浸而長說而順剛中而應大亨以正天之道也聖人明臨之利貞本諸天也臨自坤變乾剛上進將復坤以歸乾天道行乎其中剛浸而長指二陽說而順卦體剛中而應謂二九二剛中道德之美上說君心而六五下之君臣合德以臨天下天下順說其亨也大臨曰天之道无妄曰天之命道自下升命自上降蓋剛德浸長而生物之功著道之自然也是故天道之大在生物生物者天道之貞君子協進生物之功可以配天易以剛長為天

之道其旨深矣

象曰澤上有地臨君子以教思无窮容保民无疆

二陽說於下四陰順於上陽為德陰為民君子之德足以說民心而民順從之也自古先王臨天下任德教不任刑罰深仁厚澤思有以固結天下之心無已民之從其教化也亦無已故遠而夷狄恃之以安所容保者大哉後世以勢臨人一決而潰德教淺也三復斯象知教化防範不可一日弛於天下况口澤說為教澤為容无窮无疆皆自坤發之澤上有地臨民而得其防且得其歡心也讀禮書坊記篇君子設教其思為長久計也審矣

初九成臨貞吉象曰咸臨貞吉志行正也

二陽以兌說進兌為澤其體虛曰咸臨咸臨蓋公其志虛其心以道而感通乎上者也初九位在陽先必貞而吉夫四陰以上臨下陰惟陽之求初以陰居下苟所適不正莫可有為於臨矣惟初得陽之一志專應四而求比於五以陽感陰其誠易通臨大之治其基於此乎漸曰進以正可以正邦然則在臨之先必貞然後可以臨人而易變其風俗也九二咸臨吉无不利象曰咸臨吉无不利未順命也事君而感之以道利孰大焉道何也中也二得位得時而以剛中應五道合從弗合去蓋必有以感

動人主心意收大人正君之效俾純於乾德而後已固不肯偷容苟合終至危人之國使其君不能有臨也故曰无不利陽進陰伏而君臣之德同何往不利大抵致其君為堯舜君必有所以大正其心固非屑屑順命者能之巽為命反巽曰未順命且陽進變陰志方上達彼豈肯以順而喪其節也哉六三甘臨无攸利既憂之无咎象曰甘臨位不當也既憂之咎不長也

三居兌說上其位不中以柔順之資求說二陽是謂甘臨君子說之不以道不說也如之何欲以甘臨君子哉夫臨人而不能內盡其誠徒規規求說

於外若百姓固可欺斯須而其久必離何哉誠不足以固結其心也況用之君子安能有說而覬倖君子肯從已歟在臨无攸利矣六三互位有坤順震動艮止象動而能止為既憂憂之如何易心退聽而以至誠順君子斯可也下君子而化之陰消陽復馴可致泰於臨何咎且夫甘德之失也德失憂之可以无咎吾以是知遷善功足以格天獨患夫為之不力耳

六四至臨无咎象曰至臨无咎位當也

五曰大君四曰至臨至坤德也四以順德下應初陽臨下順賢其德必進其道必行臨之至也夫四

位近君互體坤中而一心應陽不撓其進上順於君下說於民臣德至矣何所可咎象言位當謂與初正應其位當也

六五知臨大君之宜吉象曰大君之宜行中之謂也內有剛德而用之以柔知臨也且夫人君惟不知行中而亢志自用踈遠忠賢是以在治忘亂不戒陰生政事法度浸至墮壞而失夫所以臨涖之道臨二陽浸長君子道盛君天下者於此何為哉行中德以任君子斯無為而利澤及天下得臨之正矣蓋人君據大位以臨天下每患恃其聰明智力而不知屈已下賢驕盈怠傲日肆一日忠言莫告

以顛以覆若是則君不君矣非所宜於臨也六五用柔之中德順有常虛其心損其剛下應於陽凜凜然惟懼陰之復生而盡誠以行其中二陽協應臨道以大吉執禦也周成任周公為知臨政事一出特為心腹周公聰明智力成王之聰明智力也成王知臨矣剛長於內將復於乾且得賢而所臨者大曰大君六五居坤順中下履兌澤之虛德順有常而能虛已下賢是以有大君之稱云

上六敦臨吉无咎象曰敦臨之吉志在內也

上處臨極反得坤之厚不以勢位臨下操心積意惟賢之順二陽非已應拳拳若不一日忘德之厚

也曰敦臨且居上臨下而獨以厚賢為志賢進泰天下說歸吉可得矣坤上為敦兌承坤以兌陰合坤陰復有坤體下臨二陽為志在內夫臨人而在上位鮮不驕亢自處蔑棄賢才非厚德君子以天下百姓為心未有能善用其志者矣



觀盥而不薦有孚顒若

柔曰大觀在上順而巽中正以觀天下觀盥而不薦有孚顒若下觀而化也觀天之神道而四時不忒聖人以神道設教而天下服矣

陰生一曰姤二曰遯三曰否五曰剝陰長陽消其

卦多凶四陰迺有觀象聖人意何在也聖人憂陰之起思有以止而化之為君天下計甚厚也夫使為天下君而能本中正至剛之德以治天下天下觀而化之可常治無亂又何憂陰之復起哉且觀自臨來二剛之德浸長於內至觀剛得位而在上執巽之仁以孚率天下悅服歸之化道於是盛行焉稽諸天道觀為八月卦兌金用事化萬物而孳斂之將使復其純一之性非若否之閉而不通此觀之所以獨異於諸卦也觀盟而不薦有孚顒若謂何祭祀之禮先盟後薦始盟則誠至薦怠矣人之通情也盟而不薦則誠德不息始終如一足以

感格其孚顒若下觀而化觀道於是盛矣舜恭己正南面顒若也蓋聖人之誠本自修身而中正者修身之本聖人體中用正無過失於天下舉海內之心皆為我心心之所格孰不化顒若之用斯為大九五以巽仁居互艮上艮止為有孚互巽潔齊艮手為盥下坤坤地備物為薦坤在內為不薦大觀在上順而巽中正以觀天下謂何聖人於天下

一視同之其德大曰大觀陽本在上曰大觀在上順巽所以行其化中正所以成其化順巽中正孰不心悅而從之下觀而化理宜然也觀天之神道而四時不忒聖人以神道設教而天下服矣神者

通志堂

通志堂

通志堂

何誠也天以誠運而四時不失其序曰天之神道
 聖人仰觀諸天以躬行其至誠有教存乎其間本
 之仁義著之禮樂施之刑政皆教也聖人之教自
 身達之天下斯民從化莫知所從其道如神曰聖
 人以神道設教詩云自西自東自南自北無思不
 服神道格應之功也四陰有四時數巽風為神坤
 順為天下服

象曰風行地上觀先王以省方觀民設教
 教之本在誠其具則禮樂刑政夫禮樂刑政必因
 其俗若風行地中隨所寓以致生養之功夫先王
 之省方以至誠愛民之心而修其教化不徒出也

巽白眼為省方為觀申命為教坤地為方眾為民
 初六童觀小人无咎君子吝象曰初六童觀小人道也
 初以陰處坤下為童智不足以有觀若童之無知
 曰童觀語曰民可使由之不可使知之謂民可率
 而使由吾化不可強以知也童觀在小人則无咎
 若夫士君子不能觀上德化以修其身而朝夕於
 中正之歸何補天下是君子無所用於觀也其道
 吝觀自乾變坤故初有君子小人二象
 六二闚觀利女貞象曰闚觀女貞亦可醜也
 闔戶謂之坤居坤陰中曰闚乾一變巽卦體互巽
 巽白眼為闚陰得中為利女貞互巽兌有順說之

性為醜且夫履柔守靜臣道之常然大觀在上非剛中之臣則不能與上合德以格正其君而大有為於當世故君子必謹養剛德俾識明學正而後有遠大之見可副大觀之求也且處羣陰中而厥觀不遠昧於大體上有剛健中正君以至誠之德風動天下而已默默守常無所建明順說以從其上而已君子不知恥可也君子而知恥能一日安於觀哉曰利女貞女以是為貞其事則可醜也夫女從人者也若君子道合而後從其所見遠且大又安肯枉已徇人若闕觀者所為乎

六三觀我生進退象曰觀我生進退未失道也

度已德業以為進退曰觀我生君子事業以生物為本讀生民尊祖之詩可見矣六三位雖不中而得坤正體順靜有常進退之際知所欽擇雖然三在觀已近高位於是而始圖進退可乎蓋三度已德不若四推四而下之不敢率先以上比大觀主於臣道未失也變巽為進退坤地為生嗚呼後世不度德量才以貪冒大位蔽賢疾能莫知省己以貽禍天下觀六三之風亦可少愧矣彼豈知一已進退天下休戚利害繫之安可重一已而輕天下哉是大惑大愚者所為君子不取也

六四觀國之光利用賓于王象曰觀國之光尚賓也

書稱堯曰光被四表舜曰重華協于帝人君光明之德本於性成於學著於天下君有明德動作施爲罔不率由禮義天下將化之而爲禮義國其光矣四體仁巽之實羣陰畢順蓋賢德之大者用能觀國以觀君觀君以行志王如賓之弗臣則道德日聞功效日著利莫大矣且大觀在上必有不召之臣相與躬行中正於上化道斯盛巽東南賓位故曰利用賓孔子釋曰尚賓謂道德之臣宜尊顯其禮而師友之不可輕也二陽得位在坤上爲國光九五觀我生君子无咎象曰觀我生觀民也君臣事業在生物而人主生物之德尤著見於民

蓋君正則民正君民一體耳譬猶響之應聲影之隨形德修於身民化於遠而天下莫不安其生遂其性其理自然也九五剛中在位至誠之德既已先天下而化之復視民從化於我何如以反求諸身九五化民之心誠矣故无咎夫民猶水也水能載舟亦能覆舟君子設法至公戰戰栗栗若朽索之御六馬無斯須之念不在民是以能常保其治也大觀四陰在下九五剛中復有君子助而象止无咎蓋陰勢已盛須至誠之道不息治抵於泰而後吉耳五巽體互艮仁以止故於觀能盡其誠而爲大觀主

上九觀其生君子无咎象曰觀其生志未平也

志不忘君且不忘天下曰觀其生二爻陽居之皆曰君子且夫四陰浸長上九雖不當位而道德足以為天下觀使遂漠然無意於時將孰與助五而止陰之消又沉陰道日進為天下害君子於此其能自免於戾邪志未平見君子憂君憂時心不少忘也五觀我生上觀其生皆取坤陰生物為義

紫巖居士易傳卷二

後學 成德 校訂

